

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

1 ¹Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuj. ²Jiya coteesacari, nojuajaari na Que Pueyasota quiriquiaa. ³Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴Nojuajaari quijiajuhuana-jaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. ⁵Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹“Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰“Pueyaso Rupaari” mijiria rucuanajojua quiquiaari. Pueyari tama nojori Shipininiajaaja niishiyaquiaari.

¹¹Tama na saquirojosano Israel pueyacua niquiaariiri. Nojoriiri na tamacaquiaari saaja. ¹²Saaja noojiaqueya pueyari nocua tiuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³Nojoriiri Pueyaso jatanishano, seetanujuanaa na muerasu nojori quiniuria. Pueyaso saquirojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajujuaj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuu-cua nojori tiuushacari saaja.

¹⁴“Pueyaso Rupaari” seetanujuanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miijiosano niquiaaarini. Jiyanhua maninia quiquiaariiri. Na Que Pueyasoori na cumaquijia jiyanhua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanoojia quijiaari. ¹⁵Tiuquinijiona Juanri Jesucristojiniji pohuataquiaari pueya niquiara. Jiyanhua na rupaa paaretaquiaariiri pueya tojitianura nojuaja. Naa sequejaari:

—Janiyacujaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyacquishacarijia.

Juanri naa pohuataquiaari Jesucristojiniji.

¹⁶Jiyaniijajanaa Jesucristo quiniuucua, puetunu pajaniyajanaari na jiitiasanojiniji masequiaani. Jiyanoehua capora na quiniuucua, nojuajaari pueyaracaanu pa cumaquiquiaa. ¹⁷Pueyasoori supuetana Moisés naajiatequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuuja, pa panijia Pueyaso quiniuucua, nojuajaari Neyanujuanaa jiyaroquiaari pocua, pa jiyanooshaanura, naajuhua, seetanu rupaajanaa pa niishiniuria nojuajiniji. ¹⁸Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pohuatasano

Jesucristojiniji

(Mt 3.11-12; Mr 1.7-8; Lc 3.15-17)

¹⁹Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví* niquiohuacuajinio supueno pueya. Noojiaqueya cuno pojorijinijinioori quiquiaarijuhua pueyacuara secojonaa pueya. ²⁰Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

²¹Cuno pueyari socua na nequesotaroehua:

—¿Canteeri quiajaniyani? ¿Quiaa jiyoteeri Pueyaso sequesano caminiujiunia Elías soj? ¿Quiaa jiyoteeri samiitiarohuacuaa?

Tiuquinijiona Juanri saaja nojori riucuaeree:

—Maja. Janiya maja supuetana Elíasni. Cuno pueyari socua na nequesotaroehuacuhua:

—¿Quiaa jiyoteeri Pueyaso sequesano caminiujiunia, noj tariucuacaanu sequesaaquiaari niriquianotej?

Juanri saaja nojori riucuaeree:

—Maja.

²²Cuno pueyari socua na sequere:

—Canaa quia pohuatareja, ¿cante quiajaniyani? Canaacua saniniuuja canaa camarucua pohuatasuhanijia.

²³Juanri saaja naa nojori riucuaeree:

—Janiyacujaari nooni, cariiquia jiyajinia nacajatej, taa supuetana Isaías juhuacarjia naajiotaquiaari janiyajinijicuaajani: “iJiyaniijiaacuaji nia nuunore maninia! iMaja shuutiuniu!”

²⁴Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵—Quiaa jaara quiyacuri Cristo, Elíasjuhua, cuno tariucuacaanu sequesaaquiaari niriquiano Pueyaso sequenu panishano caminiujinatej, ¿casaara pueya quia tiuquinijia moojiniacuaraarini?

²⁶Juanri nojori riucuaeree:

—Janiyari nareja moojinia tiuquinijia pueyani. Saniniuuja, tamonuuri niya quia, nia niishiyaquishoojua. ²⁷Nojuajaari cua nuhuaji niniutianiya. Nojuajaari Jiyaniijajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸Naa cuno pojori nequesoreesacari Tiuquinijiona Juantej, cunoori quiriquiaa Betania jiyanishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

**Jesu juhua Pueyaso borregoniyojua
pocuara mosaariquiano**

²⁹Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niqiara:

—Paari pueyaracaanu mooquiaa borregoni huanu Pueyaso jiyanooniuria pajaniya. iNia niquiri! iCuno cumaji canuijiani, cunoori Pueyaso Jiyarosano, juhua borrego puetunu pueyacuara mosocoriquiano, seetanujanaa sesa pa miishanojiniji pa jiyanooshaanura!

³⁰Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijijanaa cutara. Nojuajaari tari rishijia cucuaji cua quiaquishacarijia”. ³¹Janiyari na niishiyajijahuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³²Tiuquinijiona Juanri pueya sequeree-juhuaj:

—Janiyari Pueyaso Sohuanu niquiriucuaani jiyocuacaanu roseyano nocua juhua mococoonu. Nocua tiuushiiri. ³³Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanoo-cua roseyano, nocua na tiuuniuria, quiocua niishiri, cunocuaajaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, seetanujanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyajiquianuni.

³⁴Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, inojuajaari seetanujanaa Cristo, Pueyaso Niyanu!

**Coteenujanaa Jesu
pueyajiniji pohuatasano**

³⁵Tariqui, Tiuquinijiona Juanri tii quishiiquihua caapiqui na pueyata.

Janiyari niquiriyatu cuno caapiqui pueyanojinijinio quiriquiaani. ³⁶Tiuquinijiona Juan jaara Jesu niquiquiaari shocoyano, jiyacari canaa sequereeri:

—iNia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

³⁷Naa canaa tojishacari Juan sequesantej, canaari Jesu nuhuajiquiaarini. ³⁸Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniani?

Canaari na sequereeni:

—Niishitiojonanaa, ¿tee quia quiaacuaani?

³⁹Jesuuri canaa riucaaree:

—Miji. Nia niquiquii.

Canaari nata quiaareni. Canaari na quijia niquitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

⁴⁰Tiuquinijiona Juan niquitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitiaja. Na sesaari quijia Simón Pedro. ⁴¹Tariquicuaji, Andrésri ritia tarajanu Simón pajenuucia quiaquiaari. Na riuriatasacari, na sequereeri:

—iCua tarajanunaa, canaari Cristo niquiriquiacuaani, tariucuaaanu Pueyaso sequesano na jiyarosocoriquianotej!

⁴²Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelnio

⁴³Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

⁴⁴Felipeeri nata quiaaree. Nojuajaari Betsaida tiacajinjinio quiquiaari. Andrés-ri tarajanu Pedrota cuno tiacajinjinio quiquiaarijuhuaj. ⁴⁵Na nuhuaji, Felipeeri Natanael pajeree. Na riuriatasacari, na sequereeri:

—iCanaa noo pueyano niquiriini, Moisés nojuajiniji naajiotaquiaari tariucuacaanutej! Tariucuacaanu Pueyaso sequesano caminiujuninaa pueyari nojuajiniji naajionuutaquiaarijuhuaj. iNojuajaari Nazaret tiacajinjinio Jesu, José niyanu!

⁴⁶Natanaelri saa riucaareejaa:

—iJaj! ¿Na naatate maninia miiija pueyano supenujuuara cuno sesa miijiaca Nazaret tiacajiniji?

Felipeeri na sequeree saaja:

—iMiji! iPa niquishii!

⁴⁷Jesuuri Natanael niquirii nocua niyano. na sequereeri:

—Nio pueyanoori seetanu pa supuetana Israel niquiohuacuajinio supenujuanaa cutara. Majaari na niishiniu sapojonu.

⁴⁸Natanaelri na sequeree:

—¿Taa quia niishiya janiyarini?

Jesuuri na riucaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹Natanaelri shirriquirii. Jesu sequereeri:

—Niishitiojonanaa, iquiaacuajaqui Pueyaso Niyanu! iQuiaari parta Israel pueya jiyaniijiaranojuhuaj!

⁵⁰Jesuuri na sequeree:

—¿Quiaateeri cucua tiuuquii shusha saaja sa sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miiijosano niquiniutianiya cutara.

⁵¹Jesuuri cuniqui quiniaa pueya sequereeejuhuaj:

—Seetanujuanaa nia sequeyanijia, niaari jiya cajiniocua niquiniutianiya riateno. Pueyano cua quishacari, niaari Pueyaso seya niquiniutianiya cucua roseetaano, cucuaji taqueetaanojuhuaj.

**Jesu jatanishacari mohuaca vinora,
pueyano camishacari**

2 ¹Jiuujanaraca juuca nuhuaji, tamonu pueyanoori camiquiaari Caná tiacajinia, Galilea jiyajinia.

Masuusano pueyari queranacuriquiaa. Jesu nucuaari tii quiriquiaajuhuaj.

²Jesuuri na saquiriojosano pueyata masuusaaquiaarijuhuaj, camishacari queranacunura. Janiyari na saquiriojosa-no pueyano quiriquiaa jiyacari tarijuhuaj. ³Jiyacaritij, mashacaari ritia pequemaa. Na nucuaari Jesu sequeree:

—Sanaa, mashaca tari pequemaa.

Mashacaari quiquiaari uva* caaca, vinotuhuaj*. ⁴Jesuuri na nucua riucaaree saaja:

—Maajinia, ¿casaara quia sequeya janiyani? Juhuanajuaja maja cua poonijosacari Pueyaso cumaacata.

⁵Na nucuaari pueya raatojonaa sequeree:

—iNiocua Jesu tojirijia! Jaara nia sequere, niocua puetunu na sequesano juanaa miiri.

⁶Tii cajitiuriquiaari seis conatu, saajiajijiji quejasano. Canaa Judiocuacaari sequeyarucua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niquiara. Nojori mohuaca cajitiacojua quiquiaariirri cuno conaa. Jiyanojua puereetucocua quijiaari. Cuno conatuuri setenta tumococua mishaja mohuacata mishinishano quijia.

⁷Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma puecaco-see. ⁸Jesuuri nojori sequere:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojona cutaraari na niishiriquiaa. Nojoricuajaari mohuaca mishinijioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰Na sequereeri:

—Pueyaruhuatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuuja, nio cua ratusanoni, cunoori socua maniniuniacu vino coteenu quia raatojotesanoiniji!

¹¹Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niquitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

¹²Na nuhuaji, Jesuuri Capernaum tiacajinia quiaaree na nucuata, tapueyocucatajuhuaj, canaa na saquiriojosano pueyano. Canaari tii camueenujuquiaari pasajani.

**Jesu jaacasacari seya niquitiojonaa
Pueyaso Secojoua tiajiniji**

(Mt 21.12-13; Mr 11.15-18; Lc 19.45-46)

¹³Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. ¹⁴Na tiuquishacari, Pueyaso Secojoua tiajinia quiaaari. Tii niquishii

pueyari juyaca niquitiojiyano Pueyasoo- cuara puecoosocoriquiano, borregohua, noseyanio. Pueyari tii na juhuacutucujinia cajitiuriquiaajuhuj, pueya na tacatojonura taucuaca cumaneeca, Pueyaso Secojoua tiajinia niquitiojosocoriquiano cumaneecara. ¹⁵Naa na niquishacari pueya miyano Pueyaso Secojoua tiajiniatej, Jesuuri seya morojotaja jiyocua tatucaree. Na majacutajara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaanio. Cumaneeca rerecojoree jiyocuara juhuacutucujinijiiri. Naajuhuj, cumaneeca juhuacutucua caponeetareeri. Pojotaariquiaacuaari.

¹⁶Noseya niquitiojonaa pueya sequereeri:
—iNiiquiji nia patootare nio noseya!

¿Casaara nia jiyatecanu juhua casami niquitiojosaquiria cua Que tiani?

¹⁷Jiyacaritij, canaa, Jesu saquiriojosano pueyani, canaari niishiquiini, seetanujuaanaa tariucuacaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyano- huanijia, jiyanhua cua panishacari quia tia”.

¹⁸Naa Jesu miiniuuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niquitiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

¹⁹Jesuuri nojori riucaree miriqui:

—Pueyaso tia nia niyartare, janiyacua saaja jiuujianaraca juucajinia na tucatarohua tianu tamajaajani.

²⁰Narta Judiocuaca camarucuaari na riucaree:

—iCuarenta y seis marijiaari shoconujuquiaari pueya tucatanura nio

secojojuua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹Jesuuri tama na cuaqueyajaaja pohuatariquiaa, Pueyaso tia na sequesacari. ²²Naacujitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuqujaarini, Jesu sequesanoocuanio.

Jesu puetunu jiuujia niishijajananaa cutara

²³Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na mijiosano niquiquiaari. Naaratej, queraatia pueyari nocua tiuqujaarini. ²⁴Naajaa, majaari Jesu tiuuniu quiriquiaa seetanujanaa nojoriucua. Nojuajaari nojori niishiquiaa, taamueca pueyate nojorini. ²⁵Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

Nicodemo pocoojosacari Jesuta

3 ¹Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucuajinijinio quijia, Fariseocuaca maanujinijiniojuhuaj. Tojishano pueyano. ²Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³Jesuuri Nicodemo sequeeree:

—Seetanujanaa quia sequeyanijia, pueyano jaara juhua conaaja raaquishaa-rohua, majaari na naata Pueyaso pueyanora na quiniu, Pueyaso jitianura nojuaja.

⁴Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhua.

⁵Jesuuri na riucuaaree:

—Seetanujanaaari cua sequesano. Cua tojiri. Paari coteenu rasaquiaari pueyano pa quiniuriani. Saniniuuja, cante quiarinio pueyanora jataniquishano Pueyaso Sohuanutani, nojuajaari maja Pueyaso jitianoniyojua na quiniu quiniutianiya. ⁶Mijiria pueya muetusanoori saaja pueyano. Saniniuuja, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. ⁷Naaratej, majaari quia shiriquiniu puera, naa cua sequenuucua quiajanijatej, quiaa cuaara rasuhua, seetanujanaa quiarinio pueyano quia quiniuria. ⁸Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojijani, tee cunocora na quiaaaniuhua. Naajaariuhua, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹Nicodemoori Jesu nequesotarohuacuhua:

—¿Pueyanotucua taa quiarinio pueyanora jatanishaarejaarani?

¹⁰Jesuuri na riucuaaree:

—¿Majateeri quia niishiniu cua sequesano quiajanija? Quiaari Pueyaso Rupaa niishitiojonacuaja Israel pueyara. ¹¹Canaari seetanujanaa pohuataquiaa canaa niishishanoni, canaa niquishanojuhuaj. Niaari saniniuuja saaja na

cuaracashitiquiaa, canaa pohuatasacari niajaniya seetanu rupaajanaa. ¹²Niaa jaara saaja cuaracashitiquiaa cua pohuatasano mijiria casaajiniji, ¿niaatu-cua taa niishiriquiani, janiya jaara nia pohuatate jiyocuacaanuji casaani?

¹³Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya.

¹⁴Cariiquia jiyajinia pa supuetanaa Israel pueya rucuanesacari, Moisésri na shipinishano soconu nujuaretaquiaari macaacua, soconu sasuhua niquishocori-quiano. Na niquiniaa pueyari naatacoquiaariuhua. Naajuhua, janiyari macaacua nujuaretasocoriquianoni.

¹⁵Naacuajitij, puetunu cucua tiuuniaajaanari pueyaracaanu quijiaca quiniutianiya.

Pueyasoori puetunu mijiria quiniaa pueyajanaa panijia

¹⁶Jiyanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. ¹⁷Pueyasoori maja na jiyaronu quiquiaari janiya pueya cua saniitionura. Seetanujanaa cua jiyaroquiaari cutaraari pueyacuaji Tacuna cua quiniuria.

¹⁸Cante cucua tiuujiani, majaari na saniitosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitosocoriquiano jiyatesano quiya. ¹⁹Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaca nojori quiniuu-

cua, majaari nojori paniniu cuhuatasano nojori quiniuria. Naaratej, nojoriiri saniitosaanutaniya. ²⁰Puetunu sesa miijiacajanaari cua niquiniu paniyashijia, pueya jiuujia cuhuatana cua quishacari. Majaari nojori niniu paniniu cucua, sesa nojori miishano mariqui niishishaareeri. ²¹Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maninijanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²²Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquini-jioriquiaa moojiniani, pueya tacatosacari noojia sesa nojori miishanojiniji.

²³Tiuquinijiona Juanri jiyacari pueya tiuquini-jioriquiaajuhua Enón tiacajinia, Salím tiaca shuriucua. Juanri tii tiuquini-jioriquiaa pueya, queraatia mohuaca quishacari tii. Pueyari nocua quiojoquiaa-rijiuhua tiuquinijosano nojori quiniuria.

²⁴Juanri jiyacari nujuatejojuajinia nujuatesoo quiriquiaajaa.

²⁵Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niquiarani.

²⁶Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiquianu Jordán moo taquijiriatej, nojuajana pueya tiuquinijijajuhua. Puetunu pueyajanaa nocua quiojiya tiuquinijosano nojori quiniuria.

²⁷Tiuquinijiona Juanri nojori riucuaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸Niajanியacuajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹Pueyano rupuenta jaara camiya necocuara, quiarijia cutara necocuari seetanujuanaa saaja nerano. Naajaa, na rupuenta quishacari na shuriucua, na timitiaari na tojishacari necota pocoojiyano shuquiriaatia. Naajuhua, janiyari cunora shuquiriaatia quiarijia quiyani pueya rupesacari Jesucristo. ³⁰Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuaara carteera janiya, Cristoocua nojori pacunura saniniuuja, nojori tojiniuria nojuaja. ³¹Cante jiyocuacaanuji niquiaaricuajani, nojuajaari Jiyaniijiajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuuja, nojuajaari jiyocuacaanuji ninio cutara. Nojuajaari Jiyaniijiajanaa. ³²Naacuajitij, na pohuatasanoori tama na niquishanojuaaja jiyocuacaanu, na tojishanonio. Pueyari na pohuatasano cuaracashiti-quiaa saaja. ³³Canapuate Jesucristo pohuatasanoocua tiuujiacani, nojoriiri sequeya, seetanujanaaqui Pueyaso sequesano Neyanujiniji. ³⁴Pueyasoori jiyanhua queraatia na Sohanu niquitioquiaari na Jiyarosano. Naacuajitij, seetanu Pueyaso rupaajanaa pohuataari. ³⁵Pueyasoori jiyanhua panijia Neyanu. Naaratej, nojuajaari na jiyatequiaari puetunu casaa jiitanarajanaa na quiniuria. ³⁶Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuuja, canapuate Neyanuucua tiuyashijiacani, nojoriiri tariucua Pueyaso juaashano quiya.

Nojoriiri saniitiosaanutaniya Pueyasooju nojori quiniuria pueyaracaanu.

Jesu pocoojosacari Samaria jiyajinijinio maajitia

4 ¹Fariseocuacaari pohuatasaaquiaari, jiyanhua queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijiya Tiuquinijiona Juanjiniji. ²Seetanujanaa majaari Jesujuanaa tiuquinijionu quiriqiaa pueya. Saaja canaa cutaraari pueya tiuquinijioriquiaani. ³Jesu jaara niishiquiaari Fariseocuacanaa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴Canaa quiasacari nucuaco, canaari Samaria jiyacuma tajiriquiano quiriqiaani. ⁵Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriqiaari supuetana José cuhuariquia, na que Jacobo niquitiosano nojuaja. ⁶Cuno cuhuariquiajia quiriqiaari cuari, supuetana Jacobo jiuutiasano tariucuaacaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriqiaa. ⁷⁻⁸Jiyacaritij, canaari tiacajinia quimaani canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniani? Quiaacuajaari Judio*.

Cuno maajiiri naa sequeree Jesutej, na niishiniucua Judiocuacacujaari maja na niquiniu paniniu quijia Samaria jiyajinijinio pueya.

¹⁰Jesuuri saaja na sequeree:

—Majaari quia niishiniu cante quia sequeereni: “Cua raatere”. Quiaa jaara niishiri quia casaa Pueyaso jiitiaa quiarani, quiaa maara cua sequeere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

¹¹Maajiiri na sequeeree:

—Jiyaniijianaa, majaari quenaaja quia jiitianu casaa, mohuaca quia taquiriataja-ra. Nio cuariiri jiyano hua tucuaa. ¿Quiaatucua teje taquitiare cuno mohuacani, pueya samiitianijiani? ¹²¿Quiaateeri jiyaniijiajanaa cutara, socua pa supuetana Jacobojini? Nojuajaari nio cuari tiujaquiaari canaara. Nojuajaari niiquiji ratujua quiquiaari necohuata, na seesano seyano.

¹³Jesuuri na riucaaree miriqui:

—Puetunu nio cuarijiniji ratujuacajanaari saaja jiyamuecoquiaa.

¹⁴Saniniuuja, cante cua mohuaca ratunutaniani, majaari socua na jiyamuenu quiniutianihua. Cua mohuacaari juhua samo naca pacartanutaninya pueyaracaanu noojiajinia, shuquiriaatia na rishiniuria pueyaracaanu.

¹⁵Cuno maajiiri Jesu sequeeree:

—iPueyanonaa, cuno mohuaca cua niquitioe cua ratusocoriquiano, maja socua cua jiyamuenu, naajuhua, maja pueyaracaanu cua taquiriojonura nio cuarijiniji!

¹⁶Jesuuri na sequeeree:

—Miji quia niyaca quia sequeeco coteenu.

¹⁷Maajiiri na riucaaree:

—¿Janiyate niyacaracajarani, quiaa jaara naa cua sequeere?

Jesuuri na sequeeree:

—Quiaacuaajaari seetanujuanaa cua sequeeree: “Niyacaajunijia”. ¹⁸Seetanujua-naari. Quiaari tari cinco niyacaaraca

quiquiaari. Mariyata cuno, quiarijia quiata quiyani, majaari quia niyacaju-huaj.

¹⁹Naa cuno maaji tojjishacari Jesu sequesanotej, Jesu sequeeree:

—Jiyaniijianaa, iquiaaqui Pueyaso sequenu panishano caminiujiunia!

²⁰Canaa supuetanaa pueyari niya nio tuhuananuucua Pueyaso secojonuuja tarijia. Niajaniya saniniuuja, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

²¹Jesuuri na riucaaree:

—Seetanujuanaa quia sequeereera maajiniaa. Cua sequesanoocua quia tiuuri. Quera quiniutianiyari Pueyaso nia secojosacari puetunu tiqiyocua nia quishacarijianaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucujuhua, taa quia sequeerecuajani. ²²Niajaniyari maja nia niishiniu cana nia secojoquiaa. Canaa Judiocuacani, canaa cutaraari niishiyani cana canaa secojoquiaa. Pueyasocuaajaari canaa Judiocuaca supuetanaa niishitioquiaari pueyacuaaji Tacunaari supenutaninya tama canaa Judiocuacajinijinojuaaja. ²³Quiarijia cutara, cante seetanujuanaa Pueyaso shuquiritiajani, nojoriiri na Que Pueyaso secojonutaninya puetunu noojiatjanaa, seetanujuanaa na tojjiaa nojori quishacari. Pueyasoori naa paniya pueya secojonura nojuaja, cante na secojonuujuacacujani. ²⁴Pueyasoori sohanu. Naaratej, cante Pueyaso shuquiritini panijiacani, nojori cuara secojoora Pueyaso puetunu noojiatjanaa, Pueyaso Sohanu tojjiaa nojori quishacari.

²⁵Cuno maajiiri Jesu sequeeree:

—Janiyacuaajaari niishiyani Pueyaso sequesano Cristo mijiria na jiyarosocoriquiano niniutianiya. Nojuaja jaara tiuquiri, nojuajaari puetunu maninia pa pohuatanutanijajanaa.

²⁶Jiyacaritij, Jesuuri maatia na sequeeree:

—Janiyacuaajaari cunoni, quiata pocoojiyacuaajani.

²⁷Jiyacaritij, canaari Jesuucua tiuquijiorohuani. Canaari jiuujiatequiaa-rini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹—iMiji pueyanaa, nia niquiquii pueyano! iNojuajaari cua sequeeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

³⁰Pueyari cuno tiacajiniji Jesuucua nijioquiaari. ³¹Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuan. Canaari na sequeriquiaani:

—iNiishitiojonanaa, quia miaquere!

³²Jesuuri saaja canaa sequeeree:

—Janiyacuaaja miaquesanoracani, cuno miaquesanoori nia niishishoo.

³³Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

³⁴Jesuuri miriqui canaa sequeeree:

—Cua miishacari cua Jiyarona panishano, cunoori cua miaquesano, naajuhuj, cua tucuatasaari na panishano. ³⁵Niaari sequequiaa: “Cuaara shocojorajaara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquiniuria. Nataacuacacuaaja tari noshiquia, carojotasocoriquiano. ³⁶Na carojotanaari na

poonijionu sami niqutioshiya. Na carojotasanoori pueyaracaanu quiriquia-no. Naacuaajitij, cuhuariquia natoonaari jatiqui shuquiriniutianiya nataacuaca carojotanaata. ³⁷Naaratej, seetanujuanaa-ri nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuu-jia na carojotaja”. ³⁸Janiyari saniniuu-jia nia jiyaramiquiquianuni nataacuaca nia carojotanura quenaaja nia poonijiyaqui-shoo cuhuariquajinia. Cunoori tamasa-poonijiosano quiquiaari. Niaari juhuaja-niya tamasa poonijiosanojiniji carojotaquiaa shuquiriaatia.

³⁹Queraatia pueya cuno Samaria tiacajinijinoori Jesuucua tiuquiaari, nojori tojishacari naa cuno maaji sequesantej: “Cua sequeeree puetunu cua miishanojuanaani”. ⁴⁰Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camuee-nujunura nojori tiacajinia quenaaja. Naaratej, canaari Jesuta tii camueequiaa-ri caapiqui juucani. ⁴¹Socua queraatia cuno pueyajinijinoori Jesuucua tiuquiaari, nojorijianaa jaara Jesu tojiquiaari Pueyaso rupaa pohuataano. ⁴²Naaratej, nojoriiri cuno maaji sequetu-ree:

—Quiarijiani, majaari canaa tiuuniu Jesuucua, saaja canaa quia pohuatanuu-cua nojuajiniji. Quiarijia cutara, canaacuaajaari tama canaa numaatajaaja tojirii na pohuatasanonni. Naaratej, canaari quiarijia niishiyani, Jesuuri seetanujuanaa Pueyaso jiyanootiiriquiano pajaniya, puetunu mijiria quiniaa pueyajanaanio.

Jesu naatanishacari jiyaniijia Herodes pueyano niyanu

⁴³Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya

jiyataaree Galilea jiyajiniara. ⁴⁴Jesuuri tarijia sequequiaari: “Nio tariucuacaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujuniara maja tojishano quijia tama na jiyajinijaa’”.

⁴⁵Naajaa, Jesu jaara canaa tiuquitiasee-quiaari jiyacari Galilea jiyajinia, cuniquijinio pueyari maninia na tiuquiti-quiaari saaja. Nojoriiri naa maninia na tiuquiti-quiaari tari nojori niquiniuucua Jesu miishano na cumaacata Jerusalén tiacajinia, Pascuara nojori queranacusa-cari tii.

⁴⁶Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracua-jani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyano-hua cusosu matariquiaa. ⁴⁷Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeseeri:

—iJiyaniijianaa, cucua quia taraajere!
iCua niyanu quia naataniquii, quera cusoyano!

⁴⁸Jesuuri na riuquaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

⁴⁹Cuno camarnuuri saaja Jesu sequeeree:

—iJiyaniijianaa, mijijiaj, jati pa quiaare cua tiajinia, quianu cusoyaquishacarijia!

⁵⁰Jesuuri na sequeeree:

—Quia quiaarohua. Quia niyanucujaja tari naatarohua.

Cuno camarnuuri Jesu sequesanoocua tiuuri. Quiaarohuari. ⁵¹Jiyacari na tiajinia, na seyari niquiquiaari camarnu

niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuteree saaja nuu cajiniocuacari. Nojoriiri na sequeeree:

—iQuia niyanu tari naatarohua!

⁵²Nojori camarnuuri nojori nequesota-ree:

—¿Taacari na cusunu tajiyaatemohua-cuaani?

Nojoriiri na riuquaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³Cusosu queeri niishiquii, Jesucujajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiuuri, puetunu necohuatajanaanio.

⁵⁴Judea jiyajiniji Jesu tiuquishacari-huaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

Jesu naatanishacari cumatacuruhuana cusosu Betzata cuari shuriucua

5 ¹Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijiu-huaj. ²Jerusalén tiacaari puetunujuanaa puereetuca sohuacajiniacuma quiaa. Tohuateyacaari quiaa tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquico. ³Queraatia cusosuhuari shi matacojua cuno cuari shuriuquico. Cuno cusosuhuari quiquiaari cariojuarujuri, shipiiniquiujiunaa, cumatacuruhuana cusosuhuanio.

Nojoriiri mohuaca sashijia cuaara queyaquetesaaia. ⁴Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusunujiniji. ⁵Tamonu cusosuuri tii narta cusosuhua tajinia matariquiaajuhua. Tari na shoconujuquiaariiri treinta y ocho marijia, pueyaracaanu na matasacari. ⁶Jesuuri na niquiquiaari mataano. Noojiajinia niishirijiaariuhua cuno pueyano tari shocotejoquiaari queraatia marijia, naa pueyaracaanu na matasacari. Nocuai Jesuuri na sequere:

—¿Quiaate naatanu paniya?

⁷Cusosuuri na riucaare:

—¿Cantucua cua naacure cuarijinia cua rosenurani, mohuaca jaara queyaquetesaaecuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸Jesuuri na sequere:

—¡Quia sanere! Quia matu quia pataarohua.

⁹Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara.

¹⁰Canaa Judiocuaca camarucua jaara cusosu niquiquiaari na matu pataano, na juaatiiriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujua!

¹¹Cusosu naatanohuari nojori riucaare:

—Cua naataniniacuaa cua sequereeno: “Quia matu quia pataarohua”. Janiyari cunora na pataani.

¹²Narta Judiocuaca camarucuaari na nequesotaree:

—¿Cantejaara naa quia sequereeni?

¹³Nojori riucaareeri:

—Johua. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacujitij, Jesuuri ritia tajiniocuaarequiaari pueya tajinia, na naatanishano pueyanocuai. ¹⁴Na nuhuaji, Jesuuri na riuriataquiaari cuno juucaja Pueyaso Secojoua tiajinia. Jiyacari na sequereeri: —Quiaacuaajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhua socua, quiaa mariqui socua taraatia miiriiri.

¹⁵Naacujitij, cuno pueyanoori Jesu niishirii. Cunora, canaa Judiocuaca camarucuaa quiaareeri. Nojori sequeeseri:

—Jesui cunocuaa cua naataniriini.

¹⁶Naa Jesu miiniucua samaatenu juucatej, narta Judiocuaca camarucuaari na quiatunu panijia juucua. ¹⁷Jesuuri saaja nojori sequere:

—Cua Queeri pueyaracaanu poonijia. Janiyari cunora poonijijacuhua.

¹⁸Naa Jesu sequesacari nojoritij, narta Judiocuaca camarucuaari jiyanoahua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionucua. Socua jiyanoahua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijiajanaa, Pueyaso Niyanu na quishacari

¹⁹Nocuai Jesuuri narta Judiocuaca camarucua sequere:

—Seetanujanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajacuhua. ²⁰Cua Queeri cua panijia. Cunora, nojuajaari puetunu na miishanojuanaa

cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriqutiuniutianiya. ²¹Cua Queeri macunucua samiitianiijioquiaa, pueyaracaanu rishijia nojori quiniuria. Naajuhuj, janiyari pueya samiitianiijioquiaani, cana cua samiitiani-niu panyacuajani. ²²Cua Queeri maja na nequesoreenu quiniutianiya pueya. Nojuacuajaari tari cua niqutiocanu na cumaaca, puetunu pueyajanaa cua nequesoreenura. ²³Nojuajaari naa miiquianu puetunu pueyajanaa quiniuria cua tojitiyajaca, naatej, taa cua Que na tojitiatuquiaacuaani. Cante cua ruuretajan-i, cunoori cua Que ruuretajajuhuj, nooj, cante mijiria cua jiyaroquiaaricua-jani.

²⁴Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaniuhuj, nojuajaari pueyaracaanu Pueyasota rishiriqiano cutara. Nojuajaari maja na saniitosaanu quiniutianiya. Nojuacuajaa-ri tari samiitianishaarohua juhua macu na quiniujiniji Pueyasooju na quishacari. ²⁵Seetanujuanaa nia sequeyanijia, quera quiniutianiyari juhua macunucua quijiaca samiitiacosacari. Seetanujuanaa quiarijiaari, juhua macunucua quijiacaari cua rupaa tojtianutianiya. Cua rupaa tojtijajacaari samiitiaconutaniya, pueyaracaanu rishijia nojori quiniuria. ²⁶Cua Queeri quijijuhuanajaj. Majaari na naata shaajenu. Nojuajaari naa quijijara cua jiyatequiaarijuhuj, juhua nojuarajuhuj. Naacuajitij, cua naata pueya jiyatenu naa quijiarajuhuj. ²⁷Pueyanora cua quiniucua, na cumaaca cua niqutioreeri cuarta pueya cua nequesoreenura, nojori cua saniitionura-juhuj. ²⁸Cua tojitiare. Majaari nio sequesanoocuaji nia shiriqiniui. Tamacari, puetunu macunucujanaari

cua rupaa tojitiuniutianiya. ²⁹Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante sesa miijiaca quiquiaarini, puetunu nojorijianaari quejoosaanutaniya pueyaracaanu saniitosocoriquiano.

Jiyaniijiajanaa na quiniucua, Jesu tama nojuajiniji pohuataajaaja

³⁰Pueyasota Niyanu cua quishacari, naajaa, majaari cua miiniu tama cua panishanojuajaaja. Janiyari sesa miijiaca juaaquiaacuajani, saaja cua Que niishitishacari janiya, nojori miishanoori sesa. Tama cua panishanojuajaaja miyashijia cua quiniucua, janiyari namitijanaa nojori juaaquiaani. Janiyari pueyaracaanu miiquiaa saaja cua Jiyarona panishanonni. ³¹Pueyano jaara tama nojuajinijiaaja pohuataa narta pueyano, na pohuatasanoocua maja tiuushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuajaaja maara najuhuaa quiriqiaaj. ³²Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pohuataa seetanujuanaa. Nojuajaari cua Que. Cunora, niishiyaniija na pohuatasano janiyajinijiiri maja najuhua-naj.

³³Niaari nia pueya jiyarocanu Tiuquinijiona Juancua, nojori nequesota-nura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. ³⁴Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijiaaja. Tiuquinijiona Juanri

nojuajanaa mianuutenutaniya cuno pueyani. ⁷Felipeeri na riucaaree:

—iPaa jaara cumaneeca jiitiare doscientos juuca pa poonijosanojiniji pan pa masetajarani, cuno maara najuhuaana secaja quiri puetunu nojorirajanaa!

⁸Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanujuhuaj. Jesu sequeeseeri:

⁹—Jiyaniijianaa, caya samijia niya cinco pan jiitiaa cebada* cashojuajiniji shipinishano, caapiqui sapitiaajanio. Naajaa, cunoori najuhuaana puetunu cuno pueyarajanaa.

¹⁰Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitiujia. Naaratej, pueyari cajitiurii. Puetunu cuno pueya maanujinijiniojuanaani, saaja canuuri quiquiaari cinco mil pueya. ¹¹Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajitiuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuhuaj.

¹²Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuaana niitiasaanura.

¹³Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. ¹⁴Pueya niquishacari naa Jesu miishano na cumaacatej, nojoriiri sequeturiquiaa:

—iNio pueyanoqui seetanujanaa Pueyaso sequenu panishano caminiujiu-

nia, nooj, tariucuacaanu sequesaaquiaari pocua niriqianotej!

¹⁵Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

Jesu rucuanesacari mohuaca caco
(Mt 14.22-27; Mr 6.45-52)

¹⁶Tariucua pananu tiuquishacari, canaa, Jesu saquiriojosano pueyani, canaari rosetaaruhua caminiajinianani. ¹⁷Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiri quiriquiaa. Majaari Jesu tiuquiniu quiriquiohua juhuanujuaja canaacua. ¹⁸Tari canaa niuutiasacari, paratuuri jiyanohua piyarojoriquiaa. Caminiaari cnura jiyanohua cajiniuucuariquiaa. ¹⁹Canaari tari caminia jiuujiajinia quiriquiaani, seis kilómetroruhua canaa ruparetasaquiji. iCanaari jiyacari casaa niquirii canaacua catecanoyanoni! iMohuaca caco canujuriquiaari! iCanaari nocuaji shiriqitiurii jiyanohuani! ²⁰Jiyacaritij Jesuuri canaa sequereeni:

—iMaja pueretunu! iJaniyacujajania!

²¹Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

Jesu mianuutesano pueya
pajesacari nojuaja

²²Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiria cuajani. Nojoricuajari tenacari niquiquiaari saaja niquiriyatu boteeri shiitariquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani.

Majaari Jesu quianu quiriquiaa cutara canaata. ²³Jiyacaritij, Tiberias tiacajiniji boteeri tiuquiiioquiaari catecaja nojorijiniji, tee Jesu mianuutequiaari nojoricuajani. ²⁴Cuno pojori niishishacari maja Jesu quiniu quiriquiaa tari tii, canaa na saquirojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesucristo juhua poojia miaquesano

²⁵Cuno pojori tiuquiiijosacari caminia taquijiria, Jesu riuriatatureeri. Na nequesotatureeri:

—Niishitiojonanaa, ðtaacari quia niyarohuacuaarini?

²⁶Jesuuri saaja nojori sequeeree:

—Janiyari seetanujuanaa nia sequeyani, majaari nia pajenu janiya nia niquiniuucua cua cumaacata cua miishano. Niaari cua pajenuya saaja cua mianuutenuucua nijajaniya, taa nia tooquiorucuaacuajani, cua mianuutesacari nijajaniya. ²⁷Maja saaja miaquesanoocua nia tacaani, nia cuaqueya nia cumaquitajara. Cunoori maja na jiyatenu quiniutianiya nijajaniya pueyaracaanu rishijiara. Saaja nia tacaari cutara nioojia samiitianijia miaquesanoocua, pueyaracaanu rishijia nia quiniuria. Janiyacuajaari cuno nia niquitioriquiano, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosanonni.

²⁸Cuno pueyari Jesu nequesotaree:

—¿Caa canaa miiniutianiya Pueyaso panishano canaa miiniuria, Pueyaso shuquiritasano canaa quiniuria-juhuj?

²⁹Jesuuri nojori riucaaree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

³⁰Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Caa canaa quia niquitiniutianiya canaa tiuuniuria quiocuani? ³¹Canaa quia niquitricuaraja quia cumaacata quia miishano, taa Moisés niquitiquiaari canaa supuetanaacuaani. Nojuajaari jiyocuacanu pan tiniquiaari pueyaracaanu nojoriira, carliquia jiyajinia nojori rucuanijosacari. Naa naajiotasano quiyacuajaari tariucuacaanu Pueyaso Rupaajinia:

“Nojuajaari nojori mianuutequiaari jiyocuacanu tinio pan”.

Naacuajitij, canaari niishiyani Moiséscuajaari Pueyaso jiyarosano quiquiaari.

³²Jesuuri nojori riucaaree:

—Seetanujuanaa nia sequeyanijia, cuno jiyocuacanu panni, cunoori maja Moisés tinishano quiquiaari. Majaari seetanujuanaa jiyocuacanu pan na quiniu quiquiaarijuhuaj. Quiarijia cutara, cua Queeri niaacua jiyarorucuaa seetanujuanaa jiyocuacanu panjanaa cutara. ³³Cuno, Pueyaso niquitiosano pan jiyocuacanu rosenoni, cunoori puetunu mijiria quiniaa pueyajanaa samiitianijiojua cutara.

³⁴Naaratej, cuno pueyari Jesu sequeeree:

—iJiyaniijianaa, quiocua pueyaracaanu canaa niquitioriquia cuno pan!

³⁵Jesuuri nojori sequeeree:

—Janiyacuaajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijiaanihuaj, majaari na jiyamueni quiniutianiyajuhuj. ³⁶Taa cua sequeeree tari nijajaniyacuaajani, niaari juucua cua niquiya. Majaari quenaaja cucua nia tiuuni. ³⁷Naajaa, puetunu cua Que niquitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu

nojori. ³⁸Majaari jiyocuacaanuji cua rosenu quiquiaari cua miiniuria tama cua miiniu panishanojuaja. Mijiria niquiaari-nijia saaja cua Que panishano cua miiniuria, cante cua jiyaroquiaaricuaiani. ³⁹Majaari cua Jiyarona paniniu cua juurequetenura quenaaja niquiriyatujua na niquitiosanoinijia janiya. Nojuajaari paniya cutara, nojori cua samiitianijionura jiya puequesacari. ⁴⁰Canapuede cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacujitij, janiyari nojori samiitianijionutaniya jiya puequesacarini.

⁴¹Jesu sequenuucua, “Janiya jiyocuaanuji roseno panni”, tii quiniaa narta Judiocuacaari cunora juaaquioree.

⁴²Sequetureeri:

—¿Majate nio pueyano Jesucuaaja, José niyanutej? ¡Paacuaajaari na queya niishiyani! ¿Casaara quiarijia na sequeyari? “Jiyocuacaanuji rosenonijia”?

⁴³Jesuuri nojori sequeree:

—¡Tariucuaaja! ¡Maja nia juaaquionu!

⁴⁴Pueyanoori maja na naata tiuuniu cucua tamajaaja, cua Que jaara noojiajia poonijiaquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵Tariucuaaanu pueyara Pueyaso sequesano caminiujiuna naajiotasanocuaajaari naa sequeya:

“Pueyasocuaajaari puetunu nojorijianaa niishitiojonutaniya”.

Naacujitij, cante cua Que niishitiojosano tojijia seetanujuanaani, nojuajaari cucua tiuya.

⁴⁶Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricuaajani. ⁴⁷Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiara jatanishaaree.

⁴⁸Janiyacuaajaari pueya samiitianijia

panni. ⁴⁹Cariiquia jiyajinia nia supueta-naa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonuuquiaariiri. ⁵⁰Saniniuujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹Janiya-cuaajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyara-caanu quijia quiniutianiya. Nio pan, janiya na niquitionutaniya puetunu mijiria quiniaa pueycuarajanaani, cunoori tama cua cuaqueyajaaja.

⁵²Jiyacaritij, tii quiniaa narta Judiocuaari naa sequetooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

⁵³Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuaaj, majaari samiitianijosano nia quiniu quiniutianiya, pueyaracaanu quijiaca nia quiniuria.

⁵⁴Cante cua shu miaquereeni, cante cua nanaca ratureejaaniuhuaaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianijianihua jiya puequesacarini. ⁵⁵Cua shuuri seetanujuanaa miaquesano cutara. Naajuhuaaj, cua nanacaari seetanujuanaa ratusano cutara. Cunoori maja juhua mijiria nia miaquesano. ⁵⁶Cante cua shu miaquenani, cante cua nanaca ratunajaniuhuaaj, nojuajaari coojia rupueja. Janiyari noojia rupuejajuhuaaj, pueyaracaanu rupuetootesano canaa quiniuria. ⁵⁷Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu

quijia quiniutianiyajuhua, na rupuesacari janiya. ⁵⁸Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusenuuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹Jesuuri puetunu niojuanaa pohuataquiaari pueya niquiara Pueyaso secojojua tijajinia Capernaum tiacajinia.

**Queraatia Jesu nuhuajinia pueya
cartesacari nojuaja**

⁶⁰Naa pueya tojishacari Jesu niishitiojisanotej, queraatia na nuhuajinia pueyari naa sequetooquiaari tamajaaja:

—Cuno na sequesanoori jiyanohea jiyajeneta pa miiniuria puetunujuanaa. Maja pa naata. ¿Cantucua na tojirijaara-jaraanijia?

⁶¹Jesuuri naa nojori sequesano niishirinoojiajinia. Nocuai nojori sequereeri:

—¿Niaateeri naa cua sequenuucua juaya? ⁶²¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niquiaaricujani? ⁶³Cua shu maja cumaacaraca pueya na samiitianiuria. Saaja cua Sohuanu cutaraari pueya samiitianijia, pueyaracaanu rishijia nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiuria niajaniya. ⁶⁴Noojiaqueya niajanijajiniinoori cucuai taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

⁶⁵Naa sequere socua cuno pojoriiri: —Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

⁶⁶Jiyacaritij, queraatia Jesu nuhuajinia pueyari na cartequiaari. Nojoriiri maja tari Jesuta na rucoojonu quijia.

⁶⁷Nocuai, Jesuuri jiyacari canaa na saquiriojosano pueya nequesotaree:

—¿Niajanijariuhuaj, niaateeri cua cartenutaniyajaacuhua?

⁶⁸Simón Pedroori Jesu riucaaree:

—iMaja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasanocujaaari na naata canaa jataniniu pueyaracaanu rishijia canaa quiniuria. ⁶⁹Canaacujaaari tari quiocua tiuquianuni, canaa niishishacari quiaari Pueyaso Niyanu, saa maninia miijiaja.

⁷⁰Jesuuri canaa sequere:

—Niaacujaaari tama cua saquiriojosano doce pueyajaaja. Saniniuujia, niquiriyatu niajanijajiniinoori sesaaca.

⁷¹Naa Jesu sequesacaritij, Judasjinijiqueriaaari, Simón Iscariote niyanuni. Nojuajaari seetanujuanaa niquiriyatu canaajinijinio Jesu doce saquiriojosano pueyajinijinio quiquiaari. Naajaa, tama na Jiyaniijiajaaja tacartariquiano quiriquiaaquiiri.

**Tama Jesu tapueyocuacajaaja Jesuucua
tiuyashijiaa quiquiaari**

7 ¹Na nuhuaji, Jesuuri Galilea jiyajinia rucuanajoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja.

²Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariiri pueyari ocho juuca shocotejoquiaari suhuorotucujinia nojori quishacari. Naa miitiquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijiaa quiquiaari, pueyaracaanu nojori camarucuneejotasacari cariquia jiyajinia nojori quishacari. ³Jiyacaritij, tama Jesu

tapueyocuacajaarijia naa Jesu sequeturee nojori macaatiniuria nojuaja:

—iMajaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquiniuria puetunu quia miishanojuanaa. ⁴Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niquiarajanaa Jerusalén tiacajiniajuahuaj.

⁵Majaari quenaaja tapueyocuaca tiuuniu quijia Jesuucua. Cunora naa na sequetureeri. ⁶Jesuuri saaja nojori riuacuaree:

—Juhuanajuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhuajaniya quiaaretej. ⁷Niarta mijiria quijiaa pueyari maja na naata juaani niajaniya. Janiya cutaraari nojori niquiniu paniyaquishooni. Cua niquitiuniu paniyaquiquiaari, nojori cua niishitishacari nojori miishanoori sesa. ⁸Nia quiojiyare queranacunuucua. Janiya cutaraari maja cua quianu quiniutianiya juhuanajuaja. Quiarijiani, puera juhuacarijaari cua miiniuria taa nia sequeree janiyacuajani.

⁹Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰Na tapueyocuaca jaara quiojoquiaari-cuaa Jerusalén tiacajiniara tii queranacunuunua, Jesuuri jiyasohuaja quiaaree nojori nuhuajijiuhuaj. ¹¹Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹²Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuuja sequeriquiaa-cujua:

—iMaja maninia pueyano! iPueya sapojouja najuhuanaj!

¹³Puetunu pueyajanaari naa sasacojotooriquiaa jiyasohuaja, nojori pueresacari narta Judiocuaca camarucua.

¹⁴Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojouja tiajinia. Tii coteeree pueya niishitiojonuuri. ¹⁵Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—iCuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya. ¹⁷Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacujitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaja. ¹⁸Cante tama na niishiriojosanojuaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuuja, cante na jiyarona niishitiojosano pohuataa pueyani, pueya tojiniuria na jiyarona, cuno pueyano pohuatasano cutaraari seetanujuanaa. Cuno pueyanoori maja pueya sapojouja.

¹⁹¿Niaateeri seetanujuanaa supuetana Moisés Rootasano tojitiaja? Majaruhua. Majaari quenaaja niquiriyatu niajaniyajinjinio na rootasano tojjia. ¿Casaara nia

monu paniya janiyani? ¿Supuetana Moiséste naa nia niishitiojiya na naajioneejinia?

²⁰Nojoriiri Jesu riuucaturee na juaaniutia:

—¡Quiaaqui samaruraca! ¿Cante quia monu paniyani? ¡Canaa quia sequeretoj!

²¹Jesuuri nojori sequeree:

—Puetunu niajanijajanaari shiriiquituuquianu samaatenu juuca cua miishacari niquiriyatu casaaniyojua cua cumaacata.

²²Supuetana Moisés cuajaari nia rootaquiiaari nia muela cararaatuuquia co nia mienunura, ocho juuca jaara na shocojore na rasaanujiniiji. Seetanujua-naa, nio niishishanoori maja tama Moisés niishishanojuaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiiaari naa nojori miiniuria necohua, seetanujua-naa Pueyaso saquiriojosano Israel pueya nojori quiniuriajuhaaj. Naaratej, jaara quiri samaatenu juuca, naajaa, niiaari naa nia niquiohua cararaatuuquia co miatejoquiaa. ²³Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. ²⁴Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuana pueya juaariiri na miishano jaara sesa quiaquiri.

Jesu pohuatasacari tama nojuajinijijiaaja

²⁵Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocujaja na mosocoriquianotej?

²⁶¿Taateni? Noocuajaruhua juhuajaniya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuaanaa Cristo, tariucuacaanu sequesano pocua jiyarosariquianotej? ²⁷Paacuajaari nio pueyano niishiyani, tejenote nojuajani. Saniniuuja, Cristojua-naa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸Jesuuri jiyacari niishitiojoriquiaa Pueyaso Secojojuaajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuaaj, tejenote janiyani? Naajaa, majaari cua niniu quiquiaari tama cua panishacarijaaja. Janiyari jiyarosaroni. Cua Jiyaronaari seetanujuaanaa quijiajuhanajaj. Nojuajaari nia niishishoo. ²⁹Janiyari na niishiya cutarani. Janiyacuajaari tiji ninioni. Nojuajaari cua jiyaroquiiaari.

³⁰Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiiaari, juhuanojua-ja na monu juuca quiaquishacarijia.

³¹Saniniuuja, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuaanaa jaara tiuquiri, nojuajatu-
tucua socua jiyajeneta casaa miiri na cumaacata nio pueyano miishanojiniji?

**Fariseocuaca quiatenu
panishacari Jesu juucua**

³²Fariseocuacaari cuno pueya tojiquiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucuaa roojotooquiaari. Na nuhuaji, nojoriiri Pueyaso Secojojua tia cojuanaa pueya jiyaramiqui-

quiaari Pueyaso Secojojua tiajiniara, tii nojori quianura Jesu. ³³Jesuuri jiyacari nojori sequeeree:

—Janiyari saaja rupaquijia niaata quiniutianiyani. Na nuhuaji, janiyari cua Jiyaronaacua riujiuuniutianihuani.

³⁴Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵Nocuaaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuriataaquishaanura juhuaj? ¿Parta Judiocuacaacua quianutaniya soj, noo pojoriicua Griegohua tajinia niyaquejoquiaaritij? ¿Tii niishitiojonutaniya cuno taucua soj? ³⁶¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pohuatasano miriqui Pueyaso Sohuanujiniji

³⁷Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujaquiaari pueya niquiara. Jiyanojua na rupaa paaretareeri. Naa sequeereeri:

—iCante jiyamueyani, nojuaja cuaara niiria cucua, na ratunura janiyajiniji!

³⁸Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaaajiniacuajani. Naa sequeyari:

“Cante cucua tiuyani, pueyano samiitianijojua mohuacaari noojiajiniji jaatenutaniya”.

³⁹Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriquiaa mijiria, Jesu tacaacquishacarijia Jiyaniijia-janaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuaanuji.

Pueya juaatiosacari Jesuucua

⁴⁰Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinioori sequeeree:

—iNio pueyanoqui seetanujuanaa Pueyaso sequenu panishano caminiujuinia, nooj, tarjia sequesaaquiaari pocua niriqianotej!

⁴¹Tamasacaari saniniuuja naa sequeriquiaacujua:

—iNojuacuajaari Cristo, Pueyaso Jiyarosano pocua!

Tamasacaari saaja nojori riucaaree:

—¿Cristoteeri Galilea jiyajiniji supuenutaniya? ¡Maja! ⁴²Tariucuacaanu Pueyaso Rupaaajinia naajiotasanoiniji, paari niishiyani, Cristoori pa supuetanaa jiyaniijia David niquiohuajiniji supuenutaniya. Belén tiacajinia rasaanutaniyari, supuetana David tiacajinia.

⁴³Naacujitij, puetunu pueyajanaari Jesuucua juayonuutaquiaari. ⁴⁴Tamasacaari saniniuuja Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiuayaquishacari Jesuucua

⁴⁵Pueyaso Secojojua tia cojuanaa pueyari Jesu tojtitariquiaa juhuajaniya. Na nuhuaji, socua quiojyarojuari na jiyaramiquiniaa pueyacu. Nojori jiyaramiquiniaa pueyari quiquiaari Fariseocuaca, pueyacuara

secojonaa camarucuanio. Nojori jiyarami-quiniiaari nojori sequeree:

—¿Casaara Jesu nia jaatucuyaquimio-huani?

⁴⁶Nojori jiyaramiquishano pueyari saaja nojori riucuaaree:

—iMajaari quenaaja tamonu pueyano pocuanu juhua cuno pueyanojua, seetanu rupaaajanaa pohuataja cutara!

⁴⁷Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijajuhuj? ⁴⁸¿Tamonu pa camarucujajiniiniote nocua tiuuri, canaa Fariseocuacajiniiniujuhuj? iMaja!

⁴⁹iCuno pojori Jesuucua tiuujiacani, nojoriiri Moisés Rootasano niishiyashijia-ca! iNojoriiri sesoriquia seque!

⁵⁰Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequeree:

⁵¹—Pueyanaa, supuetana Moiséscuajaa-ri pa rootaquiiaari maja najuhuaana pa sesacanura pueyano, paa jaara coteenu na nequesoreyaquirini casaa na miiriini.

⁵²Narta Fariseocuacaari Nicodemo juaarii saaja:

—¿Quiaateeri narta Galilea jiyajiniini pueyanojuhuj? iJacaria quia pajere tariucuaaanu Pueyaso Rupaaajinia! iQuiocua jiyacari niishiri majaari quenaaja niquiriyatu Pueyaso sequesano caminiujinia pueyano supueni quiniutianiya Galilea jiyajinia!

⁵³Na nuhuaji, puetunu cuno pojorijia-naari na tiajinia quiojijarohua.

Jesu jiyanooshacari maaji

8 ¹Jesuuri saniniujia Olivo cuhuari-quiajinia quiaaree. ²Jesuuri tariquicuaji tiuquiriohua Pueyaso Secojoua tiajinia. Canaari nata quiriquiaajuhuj. Pueyari nocua rerejoquiiaari. Nojuajaari cajirii pueya na niishitiojonura juucua.

³Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaaquiiaari numuetucushiyano. Nojoriiri cuno maaji nujuateree pueya tacoji. ⁴Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. ⁵Moisés Rootasanojiniji paari niishiyani, jiyano maaji cuaraa mosaaria saitia jacusano. ¿Quiajanijarijiaataj, taa quia sequeyani-jia?

⁶Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiaata. ⁷Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijajiniiniote sesa miyashijiani, nojuaja cuaraa na coteetaara janu.

⁸Jesuuri jororohuacuhua socua na naajionura jiyacua. ⁹Cuno pojori tojishacari naa Jesu sequesaneotej, puetunujuanari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojorijiniiji. Nojoriiri naa quiojoquiariuhua puetunujuanaa. Saaja Jesuuri jateequae cuno maajitia. ¹⁰Jiyaciritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajaniya saitia?

¹¹Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janiyari quia jiyanoa cutarani.
Juhujaniya quia quiaarohua. Majaari
sesa quia miiniu socua.

Jesuuri pueya jiuujia cuhuatana

¹²Nojori nuhuaji, Jesuuri pueya
niishitiojonu coteerohua. Nojori
sequereeri:

—Janiyari pueya jiuujia cuhuatanani.
Cante cucua tiuuriini, majaari tari
ninishiqui quijia na quiniu quiniutianiya.
Pueyaracaanu cuhuashiqui quijia
quiniutianiya cutaraari.

¹³Tii quiniaa Fariseocuacaari naa Jesu
juaarii:

—iQuiaacuajaari tama quia cuaqueyaji-
niji pahuataa! iPuetunu quia
pohuatasanojuanaari maja tojishano!

¹⁴Jesuuri nojori riuucaree:

—Tama cua cuaqueyajinijijiaaja cua
pohuatasacari, cunoori maja najuhua
pohuatasano. Cua pohuatasanoori
seetanujuanaa cutara. Janiyacuajaari
niishiyani teje cua niquiaarini, tee cua
quianutaniuhuani. Niaari saniniuujia
niishiyaquiyacujua teje cua niquiaarini,
tee cua quianutaniuhuani. ¹⁵Niaari
pueyacuara saquiriojotaquiaa saaja nia
niquishanojiniji, nia tojishanojinijiju-
huaj. Janiya cutaraari maja cua
saquiriojotanu pueyacuara. ¹⁶Janiya
jaara juaari sesa mijia cutarani, cua
sequesano cutaraari seetanujuanaa,
niquiriyatujua cua quiaquishacari. Cua
Jiyarona cua Quecuajaari cua cojiquiaa
cuata na juaaniuria sesa mijia.

¹⁷Niacuajaari Moisés Rootasanojiniji
niishitiojoquiaa: “Caapiqui pueyano
pohuatasano jaara juhua tarajanu
pohuatasano quirijihuaj, cuno cutaraari
seetanujuanaa”. ¹⁸Naajuhuj, canaari
caapiquini. Tama cua cuaqueyajaaja cua
pohuatasacari, cunoori seetanujuanaa,
cua Jiyarona cojishacari janiya. Nojuajaa-
ri cua Que.

¹⁹Fariseocuacaari na nequesotaree:

—¿Teeteeri quia queni?

Jesuuri nojori riuucaree:

—Majaari nia niishiniu janiya, cua
Quejuhuaj. Niaa jaara cua niishiriquia,
niaa maara cua Que niishirijihuaj.

²⁰Jesuuri puetunu nio pohuatariquiaa-
janaa Pueyasora niquitiojosano
cumaneeca racataja shuriucujaji, Pueyaso
Secojoua tiajinia. Naajaa, majaari pueya
quianu quiriquinioj, juhuanouaja na
monu juuca quiaquishacarjia.

Jesuucua tiuyashijiacaari jiyanoyaquishaanutaniya

²¹Jesuuri cuno Fariseocuaca sequero-
huacuhuj:

—Janiyari quianutaniyani. Niaari cua
pajenuunutaniya juucua. Niaari cusu-
nutaniya sesa mijiacaja, jiyanooshoo nia
quishacarjia, cucua nia tiuyaquiniucua.
Naaratej, majaari nia naata quianu
quiniutianiya tee cua quianutaniyacuaa-
ni.

²²Naa Jesu sequesacaritj, cuno narta
Judocuacaari tama sequetooreejaaja:

—¿Casaara na sequereecuaarini:

“Maja nia naata quianu quiniutianiya tee
cua quianutaniyacuaani”? Tama na
cuaqueyajaaja miaquenutaniya jiyoteeri.

²³Jesuuri nojori sequeree:

—Niaari ninishiqui quiquojinijinio.

Janiya cutaraari jiyocuacaanujinijinioni.
Niaari saaja mijiria quijia. Janiya
cutaraari maja niiquijinioni. ²⁴Janiyacua-
jaari cunora nia sequereeni, niaari
jiyanooshoojua cusuunutaniya nia
cuaracashitiniucua janiyari maja
Pueyaso Niyanuni, taa cua sequequiaa
niajaniyacujani. Cunora niaari jiyanoo-
shoo quiniutianiya, pueyaracaanu
saniitiosano nia quiniuria.

²⁵Nojoriiri Jesu nequesotaree:

—¿Canteeri quiajaniyani?

Jesuuri nojori riuucaree:

—Janiyari najuhwana niaata pocoojiyani. Majaari nia tojiniu janiya.

Janiyacuaajaari tari nia sequereeni cante janiyani. ²⁶Janiyari queraatia jiitiajaa cua sequesocoriquiano niajaniyani. Niaa jaara nocua tiyuaquiri, niaari pueyaraaanu saniitiosaanutaniya. Puetunu cua sequesanojuanaa niajaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”.

²⁸Jesuuri cunora nojori sequeeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhua, majaari tama cua niishiriojosanojuuaaja cua miiniu quijia. Janiyari saaja cua Que niishitiojosano pohuatajani. ²⁹Cua Jiyaronacuaajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰Naa Jesu pohuatasacari pueya niquiaratej, queraatia pueyari jiyacari nocua tiuuri.

**Pueyaso pueyajiniji pohuatasano,
Sesaaca pueyajinijinio**

³¹Jesuuri shusha nocua tiuuniaa narta Judiocuaca sequeeree:

—Niaa jaara seetanujuanaa cua pohuatasano tojijiaca quiri pueyaracaanu, niaari cua pueya quiniutianiya. ³²Niaa jaara naa miiritij, niaari seetanu rupaajanaa niishijiaca quiniutianiya. Naacuajitij, niaari seetanujuanaa juhua cartesano pueya quiniutianiya, juhujaniya quijiaca nia quiniuria.

³³Narta Judiocuacaari Jesu riuucaree:

—Canaacuajaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijotesano pueya.

¿Casaara naa quia sequeya canaarini, canaa quiniuria cartesano pueyani?

³⁴Jesuuri nojori sequeeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia miiija na quiniu. ³⁵Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶Naajuhua, janiya jaara nia jaariutiare nia poonijotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷Janiyacuaajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyaquiya. Niaari cunora cua monu panyia. ³⁸Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹Nojoriiri Jesu sequeeree:

—iAbrahamcuajaari canaa shipininio!

Jesuuri nojori riuucaree saaja:

—Abraham jaara seetanujuanaa nia shipininio quiri, niaa mariqui maninia miijiaca quiricua, taa Abraham quiquiaaricuaani. ⁴⁰Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹Niaari saaja sesa miijiaca taa nia que miiquiaacuaani.

Nojoriiri Jesu juaari:

—¿Casaa quia sequeyani? ¡Canaari maja saa maaji rasanajuani! ¡Pueyasocuaajaari canaa Que, maja tamonu!

⁴²Jesuuri nojori sequeeree:

—Pueyaso jaara nia Que quiri seetanujuanaa, niaa mariqui cua paniricua,

Pueyasojiniji ninio cua quishacari. Majaari tamajaaja cua niniu quiquiaari. Cua Que Pueyasocuaajaari cua jiyaroquiaari. ⁴³Cua rupaa nia tojinu paniyaquishacari, niaari cunora cua pohuatasano niishiyaquiya. ⁴⁴Seetanujuaanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuaanaa. Pueyaracaanu sapojoujaari. Na sapojosacari, naa miyari sapojouja na quiniucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaji niaari naa sapojonuujuacajuhuj. ⁴⁵Saniniuuja, cua pohuatasacari seetanu rupaajanaa niajaniya, majaari cucua nia tiuuni quiquiaa. ⁴⁶¿Casaa cua miiquianu sesani? Cante na niishiyani cuaara sequeera. Saniniuuja, janiya jaara sesa miyashijia quirini, ¿casaara cucua nia tiuyaquiya-cuaraarini, seetanu rupaajanaa cua pohuatasacari niajaniyani? ⁴⁷Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuuja, niaari na rupaa tojiyaquiya, na muerasu nia quiaquishacari.

**Jesucristoori tariucuaaanu
quiiajuhuanaja Abrahamjiniji**

⁴⁸Narta Judiocuacaari naa Jesu juaarii: —iCanaacuaaquiiri maninia sequeriquiaa quiajanijajinijini, quiaari Samaria jiyajinijinio tahue, samaruraca pueyanotuhuj!

⁴⁹Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiqiaani. Niaari saniniuuja cua rerequetequiacu-jua. ⁵⁰Naajaa, majaari cua tacaani naa nia sesacasacari janiya. Tamonu cutaraari quiya, nojuajaari paniya pueya tojinuria

janiya. Nojuajaari cua rerequetejaca saniitioriquiano. ⁵¹Seetanujuaanaa nia sequeyanijia, cante cua rupaa tojijiani, nojoriiri maja na shaajenu quiniutianiya.

⁵²Narta Judiocuacaari na sequeere:

—iQuiarijia cutara canaari niishiyani quiaari seetanujuaanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniuuja quiarijia sequeyacu-jua: “Cante cua rupaa tojijiani, majaari na shaajenu quiniutianiya”. ⁵³¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujuniaa pueyajanaari shaajequiaarijuhuaj. ¿Canteeri quiajaniyani naa quia sequenuratej?

⁵⁴Jesuuri nojori riucuaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhuanaj. Seetanujuaanaa, cua Quecuajaari cua jiyatequiaari Jiyaniijia-rajanaa. Nojuajaari nia sequesano nia Pueyasota. ⁵⁵Niaari seetanujuaanaa na niishiyashijia. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojouja quirini taa nia quiyacuaani. Janiya cutaraari na niishiyani. Janiyari cunora na rupaa tojijiani.

⁵⁶Nia supuetana Abrahamri timiquiaari na niishishacari janiya mijiria supuenutanianiyani. Nojuaja jaara cua niquiquiaari mijiria quiyano tari, jiyanoahua timiquiaariiri.

⁵⁷Narta Judiocuacaari Jesu juaarii. Naa na sequetureeri:

—iJaj! Majaruhua juhuanajuaja cincuenta marijia shocjonu quiajaniya. ¿Taa quia sequeyarini quiaa canaa supuetana Abraham niquiquiaari?

⁵⁸Jesuuri nojori riucuaaree:

—Janiya nia sequeya seetanujuanaani, Abraham raaquishacarijia, janiyari tari quijiani.

⁵⁹Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicuaji jamaari saaja. Pueyaso Secojojuua tiajiniji tohuatamaari.

**Jesu jeeacasacari cariojuaru namijia,
naa rasanohuanajaj**

9 ¹Tamacari Jesu rucuanesacari canaata, canaari cariojuaru pueyano niquiriini, naa rasanohuanajaj.

²Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaquiaari cariojuaruni, na queya miiniucua sesatee, tama sesa na miiniucuaajaaja soj?

³Jesuuri canaa riucaaree:

—Maja. Maja cunora naa na rasaanu quiquiaari. Naa rasaquiaariiri Pueyaso cumaaca niishishaanura, na namijia jaara jeeacaare niquijiaara na quiniuria. ⁴Juua quishacarijia, pa tucutare miiniu cua Jiyarona sequesano cua miiniuria. Paa quera niniyani. Jaara niniqui, majaari pa naata poonijionu quiniutianiya tari.

⁵Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶Naa Jesu sequenu nuhuajitij, nojuajaari jiyocua riocoree. Na riacaata coniquioreeri. Coriyacau mara rupoaruhua cariojuaru namijiaacuaari. ⁷Cariojuaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariojuaruuri cuarimia quiaaree. Tii na namijia jeequeseeri. Tariucua niquijiaari na tiajinia tiuquiriohua. ⁸Cariojuaru na

quishacarijia, nojuajaari na miajajau na masetajara cumaneeca mashiniquijiojuua quiquiaari. Puetunu pueyajanaari na niquitiujia naa na mashiniquijosacari. Naacuajitij, nojuaja jaara niquijiaara quiquiaari, tarjia na niquiniaa pueyari, mariyata na shuriucua quiniaa pueyano, nojoriiri tama sequetooquiaariiaaja:

—¿Cante cuno pueyanojaarani?

¿Majate noocuaja tarjia cumaneeca mashiniquijiojuatej?

⁹Noojiaqueya pueyari sequeree:

—iTaaquiriirini, nojuajacuai!

Tamasacaari saniniuuja sequereecujua:

—Nojuajaquinio naasucua. Juhua nojuaja niquishiyacuaj, majaari seetanujuanaa nojuaja.

Tarjia quijia cariojuaruuri saa sequereejaa:

—Taaquiriirini, janiyacuaaquinatejaj.

¹⁰Naaratej, pueyari na nequesotaree:

—iQuiaacuaja cariojuaru quijiaruhua!

¿Taa niquijiaara quia quiriohuarini?

¹¹Nojuajaari pueya riucaaree:

—Cuno, Jesu jiyaniishano pueyanoni, nojuajaari mara coniquioree cucuara. Cua namijiaacua na rupoaruhuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, ijaniyari niquijiaara quiquini!

¹²Pueyari na nequesotaree:

—¿Teeteeri quia namijia jeeana pueyanoni?

Nojori riucaareeri:

—Johuaj. Maja cua niishiniu.

**Fariseocuaca nequesoreesacari
na namijia jeeacasano pueyano**

¹³Pueyari Fariseocuacaacua jiyataaree Jesu jeeacasano cariojuaru pueyano.

¹⁴Jesu jaara mara coniquioquiaari na jeeacanura cuno pueyano namijia, cuno juucaari Judiocuaca samaatenu juuca quiquiaari. ¹⁵Nocuaji Fariseocuacaari

tarijia cariojuaru quijia nequesotaree taa niquijia na quiriini. Nojuajaari nojori riucaaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuajitij, janiyari quiarijia niquijia quiyani.

¹⁶Noojiaqueya cuno Fariseocuacajini-nioori saa sequereejaa:

—Cuno pueyano, nio pueyano namijia jeeucarucuaani, nojuaja maja Pueyaso Jiyarosano. iNojuajaari Moisés Rootasano tojiyashijia, naa na miiniucua samaaten-u* juuca!

Tamasacaari saniniuujia sequeriquiaa-cujua:

—Jaara sesa mijia quiri, ¿maatucua casaara poonijiore Pueyaso cumaacata-cuaraarini?

Naa nojori juayonuutanuucuatej, nojoriiri juhua raqitiiriri. ¹⁷Nocuaji tarijia quijia cariojuaru nequesotaturo-huarihuaj:

—Niquijia quia quishacari quiarijia, ¿taa quia sequeya Jesuni? ¿Maninia mijiatee?

Nojuajaari saaja Fariseocuaca riucaaree:

—Janiyara, nojuajaari Pueyaso sequesano caminiujunia.

¹⁸Tii quiniaa Judiocuacaari na cuaraca-shitirii saaja. Nojoriiri jiyaniquaari maja naasucua seetanujuanaa cariojuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariojuaru rasanohuhanani? ¿Taa quiarijia niquijia na quiriohuanini?

²⁰Na queyari cuno pojori riucaaree:

—Taaquiriirinij, nojuacuaaquinateja canaa niyanujuaj. Naa cariojuaru rasaaniquaariiri. ²¹Majaari canaa niishiniu

cutara taa na quiriohua niquijiarani. Majaari canaa niishiniuujihuaj, cante na namijia jeeucarucuaani. Nojuaja nia nequesotare, tari cumantumacacuaaja. Nojuajananaa cuaara nia pohuataara cutara.

²²Na queyari naa riucaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuaara tenujusaaria maja Pueyaso secojoja tiajinia na tiuquiniuria socua”. ²³Naaratej, na queyari naa narta Judiocuaca riucaquiaari: “Nojuaja nia nequesotare, cumantumacacuaaja”.

²⁴Cunora cuno Judiocuacaari socua piiriohua na namijia jeeacasano pueyano. Nojoriicua na nishacari, na sequetureeri:

—iPaacuaajaari Pueyaso niquiara niya quiyani! Naaratej, iseeetanujuanaa canaa quia pohuatare cuno pueyanojini! iCanaa cutaraari niishiyani cuno pueyanoori sesa mijia!

²⁵Na namijia jeeacasano pueyanoori nojori riucaaree:

—Naajaa, jaara sesa mijia quiri, jaara maninia mijia quirijihuaj, maja cua niishiniu cuno. Janiya cutaraari niishiya-ni, iJaniyari tarijia niquiyashijia quiquiaarini! iJaniyari saniniuujia quiarijia niquijia quia cutarani!

²⁶Nojoriiri na nequesotaroahuacuhaj:

—¿Taa na miirucuaa quiajanijajaara-ni, niquijia quia quiniuriani?

²⁷Narta Judiocuaca camarucua sequeree saajaari:

—Janiyacuaaja tari nia pohuatareeni. Majaari nia tojiniu paniniu janiya. ¿Casaara nia paniya socua cuo pacutenu-ra sequenu nijaniani? ¿Niaate na pueyara quiniu paniya nojor?

²⁸Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—iQuiaari cuno pueyano tojjiaacua! iCanaa cutaraari supuetana Moisés Rootasano tojtiajacani! ²⁹iCanaa cutaraari niishiyani Pueyasojuanaari Moisés cuna muetaquiaari na rootanura nojuaja! iSaniniuujia cuno pueyanoorijiatat, majaari quenaaja pa niishiniu teje na supuequiaarini!

³⁰Na namijia jeecasano pueyanoori nojori riucaaree:

—iNiaaquiiri mosanucua seetanujanaa! ¿Majateeri nia niishiniu teje na supuequiaarini? iNojuajaari cuna namijia jeecarucua! ³¹iPaacuajaari niishiyani Pueyaso maja na tojiniu quijia sesa mijiaa secojosano! iSaaja na timitiajaca secojosano tojia cutaraari, cante na panishano miquiaacua-jani! ³²iMajaari quenaaja pa tojiniu quijia tamonu pueyanojiniji, cante cariojuaru namijia jeecajani, naa cariojuaru rasanohuanaj! ³³Cuno pueyano jaara Pueyaso Jiyarosano quiaquiri, ¿ta cuna namijia na jeecarucuaacuaraarini?

³⁴Cuno pojoriiri na juaniutia na sequeturee:

—iQuiaari sesa mijia rasaquiaari! ¿Quiaateeri jiyanojuaa canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanuosano pueyano quiquiaari narta Pueyaso timitiajaca pueyajiniji.

Jesu tojtiaashijiaa pueya juhua cariojuaru

³⁵Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequere:

—¿Quiaate Pueyaso Niyanuucua tiuujia?

³⁶Jesu sequereeri:

—Jiyaniijianaa, cua sequere canteeri nojuajani, nojuaja cuna niishiniuria nocua cuna tiuuniuria.

³⁷Jesuuri na sequere:

—Quiaacuaja na niquiyaruhua. Nojuajaari cunocuaa, quiaata pocoojiyani.

³⁸Jiyacaritij, pueyanoori Jesu cariquimiaji mojoquetaree. Na sequereeri:

—iQuiocua tiuyanijia, cuna Jiyaniijianaa!

³⁹Na nuhuaji, Jesuuri cuniqui quinaa pueya niquiara sequere:

—Janiyari mijiria niquiaarini juhua cuna raquiriojotanura mijiria quinaa. Naacuajitij, cante niishiyani nojuaja juhua cariojuaru quia, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niquijia cutara, nojuajaari juhua cariojuarura tari jiyatesaaree, cucua na tiuyaquiniuucua.

⁴⁰Tii quinaa Fariseocuaca jaara tojiquiaari naa Jesu sequesaneotej, nojoriiri Jesu sequere:

—Naa quia sequesacaritij, ¿quiaateeri sequerea canaari cariojuarujurijuhua?

⁴¹Jesuuri nojori riucaaree:

—Naa jaara tama nia cuaqueyajaaja jiyatere juhua cariojuarura cucua nia tiuuniuria, Pueyaso maara nia jiyanoori. Quiarijiani, tama nia sequenucuajaaja, “Canaa niquijia cutarani”, niaari jiyanooshoojua nioojia nia tacatoyaquiniuucua.

Jesu pohuatasano miriqui borrego cojuanajiniji

10 ¹Jesuuri socua pohuatarohua pueya niquiara. Naa sequereeri:

—Seetanujanaa nia sequayanijia, cante borrego mataca tohuatayaco tiuquiquijiani, nojuaja jaara tamocoji tiuquimia, cunoori nohuasejojua. ²Saniniuujia, cante tohuatayaco tiuquijia cutarani, cunoori borregohua camarujiana cutara. ³Tohuataya cojuanaari tiotituriataquiaa nocuaji. Borregohua camaruri puetunu na seya sesacajanaa jiyaniquijia. Na borregohuari na rupaa niishijia. Na

camaruuri naa na tohuatanijiojua puetunujuanaa na matacainijiji. ⁴Puetunu na borregohuajanaa jaara tohuareetama, na camaruuri na puetaja. Na seyari na nuhuaji sacuaa, na camaru rupaa nojori niishishacari. ⁵Saniniuuja, borregohuari maja na nuhuajini quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶Jesuuri naa pohuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

Jesucristo, maninia pa cojuana

⁷Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua.

⁸Cante cua niyacarijia nijioquiaari coteenuni, nojoriiri sesa miijiaa quiquiaari, nohuasenujuaca. Cua borregohuari namitia nojori numueejushiquiaari. ⁹Janiyari juhua tohuateyani. Cante janiyajiniji tiuquiya cua Queecua-ni, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰Nohuasejojuaaari saaja tiuquijia borregohuacua na nohuasenura, na puecoonurajuhua. Naa na shaajaaja puetunujuanaari. Janiyari saniniuuja niquiaarini cua borregohua cua jiyatenu-ra pueyaracaanu quijiacara, seetanujuanaa jiyanoehua shuquiriaatia quijiaa nojori quiniuria. ¹¹Janiyari maninia cojuanani, maja tamonu. Pueyano jaara maninia na seya cojuana

maniniu quiri, tama na cuaqueyajaaja panitiaja na seyacuaari. ¹²Saniniuuja, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiaquiniuuca na seyajanaa. Naacuajitij, sareeri borregohua soojua. Naa na cocuatajaari. ¹³Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijosano sami na niquitiosaunura.

¹⁴Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵Nojoriiri cua niishiyajuhua, taa cua Que niishiya janiyacuaani, mariyata taa cua niishiya cua Quejaniuhua. Janiyari tama cua cuaqueyajaaja panitiaja cua borregohuacuarani. ¹⁶Janiyari socua borregohua jiitiaani. Nojoriiri maja nio cua borregohua maanujinijinio. Janiyari nojori rijionutaniya niyarajuhua. Nojoriiri cua tojitiariquiano. Naacuajitij, puetunu cua borregohuajanaari jatiqui quiriquiano, niquiriyatu cojuanaracajuhua.

¹⁷Cua Queeri cua paniya naa cua panitiasacari tama cua cuaqueyajaaja cuno borregohuacua. Janiyari tama cua panishacarjiaaja mosaanutaniyani, na nuhuaji cua samiitianuhua, pueyara-caanu quijia cua quiniuhua. ¹⁸Majaari quenaaja tamonu naata monu janiya cua paniyaquishacari. Janiyari cua panishacari cusunutaniya cua borregohuacuarani. Janiyari cumaacaracani nojoriicua cua cusunura. Janiyari cumaacaracajuhua cua samiitianuhua. Cua Quecuajaari naa cua miiniuria cua jiyaroquiaari mijiria.

¹⁹Narta Judiocuaca jaara tojiquiaari naa Jesu sequesante, nojoriiri socua

tama juayonuutaquiaarijiaaja Jesuucua.

²⁰Queraatia pueyari jiyacari sequeeree:

—iCuno pueyanoori samaruraca! iMaja na tojinu, pueyanaa! iNajuhua na pocuaano!

²¹Tamasacaari saniniuujia sequeri-quiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? iMaja! ¿Pueyanoteeri na naata samaru cumaacata jecanu cariojuaru namijiajaara? iMaja na naata!

**Judiocuaca camarucua niquiniu
paniyaquishacari Jesu**

²²Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujanaa juhua Pueyaso quiquiora na quiniuhua. Jiyacariiri shuniya quiriquiaa. ²³Jesuuri tii quiriquiaajuhua. Pueyaso Secojoua tiajinia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujiuuniu-quojoriquiaa. ²⁴Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutianiya socuaari cante quiajaniyani? iQuiaa jaara seetanujanaa Pueyaso Jiyarosano quiri, quiarijia canaa quia sequeere!

²⁵Jesuuri nojori riuquaree:

—Janiyacuaa tari nia sequecanuni. Niaari saaja na cuaracashitiquianu. Niaa cuara niishiiria cante janiyani, nia niquishacari cua miishano cua Que sequesano janiya. ²⁶Niaari saaja cucua tiuyaquiquiaa cua borregohua maanujini-jinio nia quiaquishacari. ²⁷Cua borregohuari cua rupaa tojjia cutara. Janiyari nojori niishiyajaaniuhua. Nojoriiri cunora cua nuhuajiquiaa.

²⁸Janiyari pueyaracaanu quijiaara nojori

jiyatequiaani. Majaari nojori juurequenu quiniutianiya. Majaari quenaaja tamonu naata jaariutianu quiniutianiya nojori janiyajiniji. ²⁹Cua Queeri cua borregohua cua niquitioquiaari. Nojuajaari socua jiyanoehua cumaacaraca tamasaca cumaacaraca quijiacajiniji. Naacuajitij, maja quenaaja tamonu naata cua borregohua jaariutianu cua Quejiniji. ³⁰Janiya cua Queta, canaari juhua niquiriyatuni.

³¹Jiyacaritij, canaa Judiocuaca camarucuaari sai rijiorohuacuhua, Jesu na jacutajara juucua. ³²Jesuuri saaja nojori sequeeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³Nojoriiri Jesu riuquaree:

—Majaari canaa jacunu quiniutianiya quiajaniya maninia quia miiniucua. iCanaari quia jacunutianiya sacuaraatia quia pocuanucua Pueyaso niquiaa! iQuiaari tama quia cuaqueyajaaja jiyateya juhua Pueyasora! iCunoori jiyanoehua sesa! iQuiaacuajaari pueyano, juhua canaajuhua!

³⁴Jesuuri nojori sequeeree:

—Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quia tii:

“Janiyacuaajaari nia sequequiaarini, niaari pueyasohua”.

³⁵Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojunaari pueya jiyaniquiquiaari “pueyasohua”, noo pojori, teyano nojuaja jiyatequiaari Israel pueya jiitianaaracuajani. ³⁶Naaju-hua, Pueyasocuajaari nia saquiriojoquiaari mijiria na jiyarosocori-quiano. Naa Pueyasojunaari Jiyarosano cua quishacaritij, ¿niaatucua casaara sequereni janiya Pueyaso niquiaa

pocuaree sesani, cua sequesacari janiya Pueyaso Niyanuni? ³⁷Janiya jaara cua Que panishano miyaquiri na cumaacata-ni, janiya maara nia juayaquirini cucua nia tiuyaquinuucua. ³⁸Niaacuajaari cua Que cumaacata cua miishano niquiquiaa. Niaa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishano-juanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueya-jaaniuhuj.

³⁹Jiyacaritij, nojoriiri socua Jesu quiatunu paniriohuacuahuaj. Jesuuri saaja nojoriicuaji mashiquii.

⁴⁰Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini.

⁴¹Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaarijiaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

⁴²Naacuajitij, queraatia pueyari Jesuucua tiuquiaari tii, tee canaa quiriquiaacuajani.

Lázaro shaajenujiniji pohuatasano

11 ¹Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijihuaj. ²Lázaro rimiatu Maríani, nojuajaari noo maajicuaja Jesu niohuaca sacuanijia-quiaari na muecacatatej, nocua na totanu nuhuaji na shanohua jaanutaja. ³Lázaro matasacari cusosu, na rimiatuhuari

pueyano jiyarotuquiaari Jesu numoote-nuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴Jesu tojishacari naa cuno pueyano sequesanotej, tii quiniaa pueya sequereeri, canaajuhuj:

—Nojuajaari maja na cusonu quiniutia-niya na shaajenura puetunujuanaa. Cuno cusonu na jiidiasanojinijini, pueyari Pueyaso cumaacata miishano niquiniutia-niya. Pueyari cunora Pueyaso Niyanu maniniuhuaqueetanutaniya, cua Que Pueyasojuhuj.

⁵Marta, María, Lázaronio, nojoriiri Jesu panishano pueya quijia. ⁶Naajaa, Jesu jaara numootesaaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaa-raari, tee canaa quiriquiaacuajani. ⁷Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸Canaari Jesu sequereeni:

—Niishitiojonanaa, cuniquijinio Judiocuacacuajaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

⁹Jesuuri canaa rucuaaree miriqui:

—Janiyara, juuca juhuanojuaja. Juucaari maninia seetanujuanaa pa rucanejonura. Paa jaara pananu tiuquiyaquishacarijia rucanejoreni, paari maninia niquiya pocuajini. Majaari pa tiuriiniu. ¹⁰Paa jaara ninishiqui rucanejore saniniunijia, paari tiuriijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucanejonura, na mosaanu juuca quiyaquishacarijia.

¹¹Na nuhuaji, Jesuuri naa canaa sequeeree socua:

—Pa rupuena Lázaroori tari maquequee. Janiyari na niucuajanuucua quianutaniyani.

¹²Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacujiti paari niishiyani naatanutaniuhuacujaaqui. ¿Paatucua casaara najuhuana nocua quiaareni?

¹³Naa Jesu pohuatasacari canaa Lázaro-jiniijiti, canaa sequeriquiaa juucuaari Lázaro tari macu quiriquiaa. Canaari saniniujia jiyaniriquiaani Jesu naasucuaari canaa pohuatariquiaa Lázaro nareja maqueriquiaa. ¹⁴Nocuai Jesuuri maatia canaa sequeeree:

—Lázaro tari cusoyarucuaa. ¹⁵Janiyari timiyani tii cua quiyaquiniucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquiniutianiya, seetanujuanaa cucua nia tiuniuria cutara. Quiarijia cutara, nocua pa quiaare.

¹⁶Jiyacaritij, Tomásri canaa narta saquirijosano pueya sequeeree:

—Pa Jiyaniijia pa quiaarejuhuaj, nata pa cojiritiasaanura puecoonu.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijiojua

¹⁷Canaa jaara tiuquijioseequiarini, Jesuuri pohuatasaaquiaari Lázaro tari cuatro juuca shocotejoriquiaa raaco na niasaanujiniji. ¹⁸Betania tiacaari catecaja Jerusalén tiacajiniji. (Nareja media hora* paa jaara ritia rucuaneyareni). ¹⁹Naaratej, queraatia narta Judiocuacaari quiojoquiaari Marta, María tiajinia, nojori na cumanjianura na nanu nuhuaji. ²⁰Marta jaara niishiquiaari Jesu shusha tiuquiriquiaa, nojuajaari nocua tohuata-

quiaari canaa na naacunura. Majaari María niniu quiriquiaa cutara. Tiajiniaja quiriiri. ²¹Canaacua Marta tiuquishacari, nojuajaari Jesu sequeeree:

—Jiyaniijianaa, iquiaa jaara niya quiquianu, cua nanu maara shaajeyaquiquianu! ²²Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

²³Jesuuri Marta sequeeree:

—Quia nanucujia samiitianutaniuhua.

²⁴Martaari na riucuaaree:

—Taaquiriirinij, janiyacujia niishiyani nojuajaari samiitianutaniuhua macunucua samiitiacosacariuhua jiya puequesacari.

²⁵Jesuuri na sequeeree:

—Janiyacujiaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari.

²⁶Cante cucua tiuuri saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷Nojuajaari Jesu riucuaaree:

—Jaa, Jiyaniijianaa. Janiyacujia niishiyani quiaari Cristo, Pueyaso Niyanu, nooj tariucuaaanu sequesaa-quiaari mijiria niriquianotej.

²⁸Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quianura.

²⁹Naa María tojishacari Marta sequesaa-notej, ritia saneequeeri. Jesuucua nimiaari tee canaa quiriquiaacujani. ³⁰Jesuuri juhuanojuaja maja na tiuquitianu quiquiaari canaa cuno tiacajinia. Canaari tiaca shuriucua quiriqiaajaani tee Marta naacujiaari canaacujani, Jesuucua na nishacari. ³¹Nojori cumanjianaa pueya jaara María niquiquiaari ritia tohuataano tiajiniji, nojoriiri na jiyaniquiaari na

nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³²María tiuquishacari canaacua, Jesu cariquimijaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

³³Jesu niquishacari María nujuqueyano, mariyata nata quiniaa nujuqueyanohuaj, Jesuuri nojori taraajetaree.

³⁴Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

³⁵Jesuuri nujuquese. ³⁶Tii quiniaa Judiocuaca niquishacari Jesu nujuqueyano, tama sequetooreejaarijia:

—iNia niquiri! Jiyanhua Lázaro panijiaquiiri.

³⁷Noojiaqueya cuno pojorijinijinioori sequeriquiaajuhua:

—Jesu jaara cariojuaru namijia jeecacanucuaa, maara Lázaro naatani-quianujuhua maja na shaajenura.

Jesu samiitianishacari Lázaro

³⁸Jesuuri jiyanhua na taraajenuta raa jiyajiria catecanoquiaari, canaajuhua. Raari puereetuca saajiata mishiquiosano quiriquiaa. ³⁹Jesuuri pueya sequeree:

—iSaajia nia ruutiniri tamocora!

Martaari Jesu sequeree:

—iJiyaniijianaa, cuatro juuca tari na shoconujiya! iTari mocuaatia jaaniuya naasucua!

⁴⁰Jesuuri Marta sequeree:

—Janiyacuaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanjia.

Quiaari tari cua sequesano tojiriucuaa-cuaja. ⁴²Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³Naa Jesu sequenu nuhuajitij, jiyanhua na rupaa paaretareeri. Naa sequereeri:

—iLázaronaa, quia tohuatama!

⁴⁴Macuuri tariucua saminio tohuatamaa. Na juaashiquiaca, na niohuacaari jiuniosano quiriquiaajaa. Na nacaari puetunu na jiquiocotajanaa mishiquiosano quiriquiaajuhua, toquerauta morosano. Jesuuri pueya sequeree:

—Nia saacatare, cuaara rucaneera.

Judiocuaca camarucua rojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵Naa Jesu samiitianishacari Lázarotej, queraatia narta Judiocuacaari nocua tiuquiaari, noo pojori canapuate Mariacua nijioquiaari na cumanijianura-cuajani. ⁴⁶Noojiaqueya cuno Judiocuacajinijinioori Fariseocuacaacua quiojoquiaari nojori pohuatanura Jesu miishano. ⁴⁷Naaratej, Fariseocuaca, pueyacuara secojonaa jiyaniijanucuanio, nojoriiri rerejoquiaari puetunu Judiocuaca camarucotajanaa. Nojoriiri sequetuquiaari:

—¿Taa pa miiniutianiya? Cuno pueyanoori queraatia casaa miquiaa na cumaacata pueya niquiara. ⁴⁸Paa jaara nareja na shanacure naa na miiniuriatej, ipuetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijia socua na jiyatenutaniya. Naaratej, pa jiitianaa Romano pueyari pocua nijionutianiya Pueyaso Secojoja tia nojori niyartanura, pa pueya na pucoonurajuhua.

⁴⁹Caifásri tii quiriqiaajuhuaaj. Nojuajaari canaa pueyacuara secojonaa jiyaniijijanaa quiriqiaa cuno marijiara. Jiyacaritij, nojuajaari narta camarucua sequeeree:

—iNiaaquiiri niishiyashijiaca seetanu-juanaa! ⁵⁰¿Majateeri nia niishiniu?

Maninia cutaraari niquiriyatu pueyano cusonura pa niti, maja najuhuaa puetunu pa pueyajanaa puecoosanura.

⁵¹Caifás sequesanoori maja tama na sequesanojuaja quiquiaari. Pueyacuara secojonaa jiyaniijijanaa na quishacari, Pueyasoori naa na pohuateree taa Jesu cusonutaniya puetunu Judiocuacaacuara-janaani. ⁵²Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuaaj, tee tiqiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqii na qutiuniuria juhua niquiriyatu maanu. ⁵³Naacuajitij, cuno juucajiniji, cuno Judiocuaca camarucuaari rojotooriquiaa taa nojori monutaniya Jesuni.

⁵⁴Nocujaji, Jesuuri maja tari na rucuanefonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés

rootaquiaaricuajani. Nojoriiri naa miiquiaari juhuajaniya nojori queranacunura Pueyaso niquiara Pascua juuca.

⁵⁶Pueyari tii Jesu pajenuuriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

María totasacari na shanhua

jaanutaja Jesuucua

(Mt 26.6-13; Mr 14.3-9)

12 ¹Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitiani quiaaricuajani. ²Cuno tiacajinijinio Jesu rupuenaa pueya timitiasacari Jesu, nojoriiri sumatunu quiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatanio. ³Jiyacaritij, Maríari Jesuucua pataree na shanhua jaanutaja. Cunoori “nardo” jiyani shano nataujiniji shipinishano quiquiaari. Jiyanhua queraatia cumaneecata masesano. Puereetuua moti quio cajiniocua puecariquiaari cuno shanhua jaanutaja. Maríari Jesu niohuacaacua na totaree. Na nuhuaji, na sacuanijiarohua na muecacataari. Puetunu tiacajuanaari shanhua jaanuriquiaa. ⁴Naa María miishacaritij, niquiriyatu canaajinijinio Jesu saquiriojosano pueyanoori juarii. Nojuajaari Judas Iscariote quiriqiaa, na nuhuaji Jesu quiatequiaari na paraani. Nojuajaari naa sequeeree:

⁵—¿Casaara cuno shanohua jaanutaja niquitioyaquishaaree queraatia cumanee-carani, casamijuniucua pueya niquitiojosocoriquianoni? ¡Jaara masenu panishaare, maara niquitiosaare juhua niquiriyatu marijara pueyano poonijionu sami!

⁶Naa Judas sequesacaritij, majaari seetanujuanaa na taraajenu quiriquiaa casamijuniucua pueyacu. Naa sequereeri saaja cumaneecaacua jiaatiaja na quiniucua, nohuasejojua na quishacari. Judasri cumaneeca quiquio cojuatana quijia puetunu canaaraanaa. Naacaujiti, nojuajaari tiji nohuasejojua, pueya niquitiojosanojiniji canaara.

⁷Jesuuri saaja Judas sequereeri:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸Casamijuniucua pueyari pueyaracaanu niaata quiriqiano cutara. Saniniujia, janiyari maja pueyaracaanu niaata quiriqianoni.

Pueyacuara secojonaa jiyaniijianucua roojotoosacari Lázaroocua

⁹Queraatia canaa Judiocuacaari niishiquiaari Jesu Betania tiacajinia quiriquiaa. Cunora, nojoriiri nocua quiojoquiaari na niquiniucua, Lázaro niquiniucujahuaj, teyano Jesu samiitiani-quiaaricuajani. ¹⁰⁻¹¹Jesu samiitianiniucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooquiaari Lázaro na motunurajahuaj.

Juhua Jiyaniijiajanaa Jesu tiuquishacari Jerusalén tiacajinia

(Mt 21.1-11; Mr 11.1-11; Lc 19.28-40)

¹²Cuno queraatia pueya, tari Jerusalén tiacajinia quiriquiaacua Pascua juucara

queranacunurani, nojoriiri niishiquiaari Jesu tariqui tiuquiniutianiyajuhua. ¹³Nocuai, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacooriquiaajaariuhua nojori shuquiritia-sacari Jesu:

—¡Pocuai Tacuna! ¡Pocuai Tacuna!

¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacuajani! ¡Nojuacuajaari Israel pueya Jiyaniijiajanaa!

¹⁴Jesuquiri jiyacari burro niquiojua riuriatamaa. Tari na ninia cajiriquiaari, taa tariucuacaanu Pueyaso Rupaajinia naajiotasano quiyacuajani. ¹⁵Naa sequeyari:

“¡Sión* tuhuananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niquiojua ninia cajiyari!”

¹⁶Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiri Jesujiniji quiquiaari.

¹⁷Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquioquiaari Lázaro na raacoji na tohuatanurani.

¹⁸Queraatia pueya niishishacari naa Jesu miishano na cumaacatej, nojoriiri Jesu naacunuucua nijiyaree. ¹⁹Nocuai, Fariseocuacaari tama sequetooriquiaajaaja:

—¡Canaacuajaari cunora nia sequequiaa-ni pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

Grecia jiyajinijinio taucuaca pocojonu panishacari Jesuta

²⁰Grecia jiyajinijinio taucuacaari Jerusalén tiacajiniara nijioquiaarijuhuaj Pueyaso

niquiara nojori queranacunuunura Pascuara.

²¹Cuno pojoriiri canaa cojinia Felipeecua catecanoquiaari. Felipeeri Betsaida tiacajini-jinio quiquiaari. Cunoori Galilea jiyajinia tiaca. Cuno Griegohuari Felipe sequeetree:

—Pueyanonaa, canaa quia Jiyaniijia Jesuta pocoojonu paniyani.

²²Jiyacaritij, Felipeeri Andrés sequeeseecuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuaj. ²³Jesuuri naa nojori riucaaree:

—Quiarijiani, tama janiyajaarijia mosaanutaniya pueya nitini. ²⁴Seetanujua-naa nia sequeyanijia, sohuajajau jaara raama jataaquishaare, pueyaracaanu niquijiajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitijia na tojinuria janiya mijiriani, nojuajaari pueyaracaanu shuquiriaatia rishijia jiyatesaanutaniya. ²⁶Cante quiria poonijionu paniyani, cuaara seetanujuaanaa cua tojjia quiriia. Tee cua quiniutianiyacuaani, cua tojtijajacaari tii quiniutianiyajuhuj. Cua Queeri cua tojjiaa timitianutaniya. iJyanohua maninia nojori miiniutianiyajariuhuj!

Jesu pohuatasacari nojuaja mosaanutaniya

²⁷Quiarijiani, janiyari jyanohua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaari mijiriani. ²⁸iCua Quenaa, janiya cuaara miishiiria-qui taa quia paniyacuajani, pueya niishiniuria quiaari jyanohua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequeereeri:

—Janiyacuaajaari naa niishitirii pueyani, pueyaracaanu quia miishacari cua panishano. Janiyari socua pacutenu-taniuhua pueya niishitiniuni, quiaa jaara nojoriucuaa mosaare.

²⁹Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeetree:

—iMiacanacuaja cuno tojishaareeni!

Tamasacaari saniniuujia sequeereecujua:

—iPueyaso serucujaja nocua pocuareeno!

³⁰Saniniuujia, Jesuuri canaa sequeeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojjiquiaa cua secojosacari nojuaja. ³¹Quiarijiani, mijiria quiniaa miishacari naquiya janiya, nojoriiri saniniuujia saniitosocoriquiano jiyatesaaree tari. Naajuhuj, mijiria jiyaniijia Sesaacaari jataasaanutaniyahuaj, maja cumaacaraca na quiniuria socua. ³²Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³Naa Jesu sequesacaritij, canaa niishitiriiri taa pueya monutaniya nojuajani. ³⁴Tii quiniaa pueyari na riucaaree:

—Canaacuajaari tariucuaaanu Pueyaso Rupaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajanijarijataj, ¿casaara quia sequeyarini, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanooni?

³⁵Jesuuri nojori sequeeree saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui

quiyaquishacarijia. Cante ninishiqui rucuanejojuani, nojuajaari maja na niishiniu tee na quiaani. ³⁶Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaij jamaashiiri.

Judiocuaca tiuyaquishacarí Jesuucua

³⁷Jesuuri jiyanojia queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. ³⁸Naacujitij, tariucuacaanu Pueyaso sequenu panishano caminiujiunia Isaías pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishirijiaanihuaj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

³⁹Naacujitij, majaari nojori naata tiuuniu quiquiaari Jesuucua. Isafasri naa naajiotaquiaarijiuhua:

⁴⁰“Pueyasoori nojori jiyateree juhua nimishitiuria, maja nojori niquiniuria na namijiata. Nojori niishitiaja cushitioreejaarihuaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijiuhuaj”.

⁴¹Supuetana Isaíasri naa caminiujiuquiaari Pueyaso niishitishano nojuajatej, Jesu na niquiniuucua na shacantuuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴²Naajaa, queraatia narta Judiocuacari Jesuucua tiuquiaari. Queraatia canaa jiyaniijianucuaari nocua tiuquiaarijiuhua. Cuno jiyaniijianucuaari maja na pohuatanu quijia pueya niquiara, Jesuucua tiuujiaa nojori quishacarí. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

Pueya tojitiaaquiniuucua Jesu sequesano, nojoriiri saniitiosaariquiano

⁴⁴Jesuuri jiyanojia na rupaa paareta-ree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijiaarihuaj, cante cua jiyaroquiaaricujani! ⁴⁵¡Cante cua niquiriini, nojuajaari cua Jiyarona niquiriijiuhuaj!

⁴⁶Janiyari mijiria niquiaarini cua cuhuatanura nijaniya. Naacujitij, cante cucua tiuuriini, majaari tari na quiniu ninishiqui. ⁴⁷Pueyano jaara cua rupaa tojiriquia najuhuanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua niniu quiquiaari mijiria, pueya cua saniitionura. Janiya cutaraari niquiaarini nojoriicuaij cua tacunura. ⁴⁸Cante cua ruuretaja saajani, cua sequesano tojiyaquiyajaarihuaj, nojuajaari tari nocuara saquiriojotana jiitiaa na saniitiosaanura. Nojoriria cua sequesano cutaraari tama nojoriicua saquiriojotariquianojuaja nio jiya puequesacari.

⁴⁹Cua pohuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰Janiyari niishiya-ni cante cua Que rupaa tojijiani,

nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

Jesu jeequejosacari na saquiriojosano pueya niohuaca

13 ¹Jesuuri canaa na saquiriojosano pueyata rerejoquiaari Pascuaa-cuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

²Cuno niucuaa, Jesuuri canaa na saquiriojosano pueyata miaqueriquiaa. Sesaacaari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jyanishano pueyano niyanu quiquiaari. ³Jesuuri niishijia nojuaja seetanujuanaa Pueyasojiniji niquiaari. Naajuhuj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jiitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴Jiyaniijiajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. ⁵Na nuhuaji, mohuaca shuurii tohuatashijiniaari. Canaa niohuaca jeequejoriquiaari juhua tiaco seru. Na nuhuaji, na sacuanijiariquiaajaariuhua na cajiniocua na camarucutesano cuaqueya tuujutajata.

⁶Na jeequenu panishacari Simón Pedro niohuaca, Pedroori saaja Jesu sequeeree:

—Jiyaniijianaa, ¿taa quia miyani?
¿Quiaateeri cua niohuaca jeequenutaniya?

⁷Jesuuri Pedro riucuaeree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸Pedroori Jesu sequeeree:

—iCua Jiyaniijianaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucuaeree:

—Janiya jaara quia niohuaca jeequejiyaquirini, majaari cua pueyano quia quiniu quiniutianiya.

⁹Simón Pedroori na sequeeree:

—iJaara naa quiriritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanío!

¹⁰Jesuuri na sequeeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajanijajanaari tari jeequejosano quiyacuaja. Saa niquiriyatujuaari jeequesoo quiya saniniujia.

¹¹Jesuuri tari niishiquiaari cante na quiatenutaniya na paraani. Nocuaij sequeriquiaari: “Niquiriyatu pueyanoori jeequesoo quiya cutara”.

¹²Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajanijia, taa nia jiyaniquiquiaa janiyacujani. ¹⁴Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuj, naa nia miiriquia niarta Pueyaso muerasujuhuj. ¹⁵Janiyari naa miiriini, cua niishitiojonura niajaniya, naa nia miitioonurajuhuj taa cua miirii

niajanियacuanaani. ¹⁶Seetanujuanaa nia sequeyanijia, seruuri maja socua tojishano quijia na camarnujiniji. Naajuhua, jiyarosano pueyanoori maja socua tojishano quijia na jiyaronajiniji. ¹⁷Niaa jaara cua rootasano niishiri, niaari shuquiriaatia quijiaca quiniutianiya niaa jaara na tojijiaca quiri.

¹⁸Shusha cua sequesano niajaniyani, cunoori maja puetunu niajaniyaranojuan. nia. Janiyacuaajaari niishiyani canapue cua saquiriojoquiaarini, taamueca pueyate niajaniyani. Naacuaajitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹Janiyari juhuacarijia nia toyani. Naacuaajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰Seetanujuanaa nia sequeyanijia, cante cua jiyaramiquishano pueyia tojijiani, nojuajaari cua tojiyajuhua. Cante cua tojiijara quiriini, nojuajaari cua Jiyarona tojiijara quiriijihua.

Jesu pohuatasacari, Judascuaajaari na paraa na quiateriquiano

(Mt 26.20-25; Mr 14.17-21; Lc 22.21-23)

²¹Naa Jesu sequenu nuhuaji canaatej, jiyanhua na taraajenuta naa canaa sequeereeri:

—Seetanujuanaa nia sequeyanijia, niquiriyatu niajanijajinijinoori cua paraa cua quiatenutaniya.

²²Canaari jiyacari tama niquitiooreejanijia. Majaari canaa niishiniu quiriquiaa canajiniji naa Jesu sequeriquiaani.

²³Jiyacaritij, janiyari na shuriucuaji cajiriquiaa miaquenujuajiniani, na panishano pueyano cua quiniucua.

²⁴Naaratej, Simón Pedroori cua mashini-quirii sanaa cua nequesotanura Jesu,

canajiniji naa na sequereeni. ²⁵Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

²⁶Jesuuri cua riuucaree:

—Janiyari pan rau piquiojonutaniya caacajiniani. Cana cua niquitionutaniyani, nojuajaari cuno.

Jesuuri jiyacari pan rau piquiojoree.

Judas Iscariote na niquitioreeri.

Nojuajaari tamonu Simón jiyanishano niyanu. ²⁷Judas masesaraci cuno pan rau, Satanásri noojiajinia tiuquiquii. Jesuuri jiyacari Judas sequeere:

—Cuno, quiaa na niishiriojiya miiniuni, quiocua ritia miirinioj.

²⁸Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. ²⁹Judasri canaa cumaneeca cojuatana quijia. Naaratej, noojiaqueya canajinijinoori jiyaniriquiaani Jesu naasucua na jiyaroriquiaa socua casaa na masenura canaa querana-cunuutajara, casamiiijuniucua na niquitiojonura cumaneeca soj. ³⁰Judas jaara masequiaari Jesu niquitiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maniniuhuaqueetasanutaniyani.

Pueyasoori jiyanhua maniniuhuaqueetasanutaniyajuhua, naa cua miishanojiniji. ³²Pueyaso jaara maniniuhuaqueetasare naa maninia cua

miiniucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari.

³³Quiquihuaniojuanaa, janiya rupaqui-

jia niaata quiniutianiyajaarani. Taa cua sequecanu parta Judiocuacacuaani, janiyari naa nia sequeyajaanihuaj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani.

³⁴Quiarijia nia niishitiriiria nio quiarinio rootasano. Nia tojiri. iPanitoojuaca nia quiri! Naatej, taa cua paniquiaacuaa niajaniyani, naa nia panitioorejuhuaj. ³⁵Niaa jaara naa panitoojuaca quiri, puetunu Pueyaso niishiyashijiaca pueyajanaari naacuaji niishiniutianiya, niaari cua tojitiajaca pueya.

Jesu pohuatasacari Pedro nocuaji seetanutaniya

(Mt 26.31-35; Mr 14.27-31; Lc 22.31-34)

³⁶Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riuquaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷Pedroori na sequeeree:

—Jiyaniijianaa, ¿casaara quia sequeyaringi, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quiocuaraani.

³⁸Jesuuri na riuquaree:

—¿Naatee? ¿Quiaate tama quia cuaqueyajaaja tarinijiotaaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

Jesuuri juhua nuu Pueyasocua

14 ¹Jesuuri naa canaa sequeeree socua:

—Maja nia tacaani, pueyanaa. Nioojia nia cajitiri. Saaja Pueyasocua nia tiuuri.

Cucua nia tiuurijuhuaj. ²Cua Que tiaari puereetuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiaquiritij, janiya maara nia sequeyquirini janiya nia puetanutaniyani, niaacuaji cua jeenucuanura. ³Cua jeenucuanu nuhuaji nia quiquiora, janiyari niaacua tacatenu-tanihuani, cua rijionuhuaa niajaniya, cuata nia quiniurajuhuaj tee cua quiniutaniyacuaani. ⁴Niaacuajaari cua quiquojiniara neteja nuu niishiya, tee cua quianutaniyacuaani.

⁵Tomásri Jesu sequeeree:

—Jiyaniijianaa, imaja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶Jesuuri na riuquaree:

—Janiyacuaajaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani.

Janiyari pueya samiitianijiajuhuaj. Majaari pueya naata Pueyaso rupeenu tamajaaja. Saaja janiya cutaraari pueya ruputeja Pueyasoni, nojori tiuushacari cucua. ⁷Niaa jaara seetanujuanaa cua niishiquiaaricuaa, niaa maara cua Que niishirijihuaj. Seetanujuanaa, niaari tari na niishiyacuaja. Niaari na niquiquiaaju-huaj.

⁸Felipeeri na sequeeree:

—Jiyaniijianaa, quiaa jaara canaa niquitiri quia Que Pueyaso, canaacua panaatia quiriohuani.

⁹Jesuuri Felipe riuquaree:

—Felipenaa, janiyacujaruhua pueyara-caanu niaata quiquiaa juucuanu. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajaarihuaj. ¿Casaara quia sequeya cua niquitiniuria cua Que niajaniyarini? ¹⁰¿Majateeri quia tiuuniu cucua cua sequesacari quiajaniya,

janiyari cua Que jiuujiajinia quiyani, cua Queeri saniniuujia coojiajinia quiyacu-jua? Canaari maja rimiajatani. Nio, cua sequesano niajaniani, cunoori maja tama cua niishishanojuaja. Cua Que, coojiajinia quiyani, nojuajaari na panishano miitiquiaa janiya. ¹¹Cucua nia tiuuri cua sequesacari niajaniani, janiyari cua Que jiuujiajinia quiyani, cua Queeri saniniuujia coojiajinia quiyacu-jua. Niaa jaara cua sequesanoocua tiuuniu paniyaquiri, cucua nia tiuuriqui na cumaacata cua miiniuucua nia niquiara. ¹²Seetanujuanaa nia sequeyanijia, cante cucua tiujiani, nojuajaari puetunu cua miishanojuanaa miiniutianiyajuhua. Cua tacasacariuhua cua Que shuriucua cua quiniuhua, cucua tiuujiaacari cua cumaacata seetanujuanaa socua jiyajeneta casaa miiniutianiya cua miishanojiniji. ¹³Seetanujuanaa nioojiajinia cua quishacari, janiyari niaara miiniutianiya-ni puetunu nia masesanojuanaa nia secojosacari cua Que. Naacujitij, pueyari cua Que timitianutianiya, nojori niishishacari cua Queeri jiyanojua maninia mijia. ¹⁴Nioojia rupuetosacari coojiata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutianiya mijiria

¹⁵Niaa jaara seetanujuanaa cua panijia-ca quiri, niaari cua rootasano tojitiajaca quiniutianiya. ¹⁶Naajuhua janiyari cua Que secojonutianiya, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiri-quiano. ¹⁷Nojuajaari Pueyaso Sohuanu, seetanu rupaa jiitiana-janaa. Pueyaso tojiyashijia pueyari maja na naata cuno Sohuanu na jiitianu, nojori niquiyaquiniucua nojuaja, na niishitiyaquiniucua nojuajuhua. Niaa cutaraari na niishijia. Nojuajaari niaata

quiyacuaja. iPueyaracaanu nioojiajinia quiri-quianojaariuhua!

¹⁸Majaari seetanujuanaa cua tiujianu quiniutianiya niajaniani juhua japueyojuacania quiniuria. Janiyacuajaari tacatenutianuhua niaata cua quiniuhua. ¹⁹Pueyaso tojitiaashijia pueyari quiari naataja cua niquiyaquiniutianiya socua. Niaa cutaraari cua niquijia quiniutianiya. Samiitianijio-jua cua quiniucua, niaari pueyaracaanu quijia quiniutianiyajuhua. ²⁰Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacajuhua. Janiyari saniniuujia nioojiajinia quijiani. ²¹Cante cua rootasano niishijiani, nojuaja jaara na tojijia quiri-juhua, nojuajaari cua panijia cutara. Cante cua panijiani, cua Queeri na panijia quiniutianiyajuhua. Janiyari na panijia quiniutianiyajuhua. Janiyari cua panijiaa-cua niniutianiya, seetanujuanaa na niishiniuria janiyari nata quiyani.

²²Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

²³Jesuuri na riuquaree:

—Cante cua panijiani, cua rootasano tojijiajaariuhua. Cua Queeri jiyano pueyano panijia. Naaratej, canaari nocua niniutianiya, noojiajinia canaa quiniuria, canaa quiquiora canaa jiyatenura nojuaja. ²⁴Saniniuujia, cante cua paniyaquijiani, jiyano pueyari cua rootasano tojiyashijiacajuhua. Puetunu cua rootasanojuanaa, niaa na tojiquiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricujani.

²⁵Janiyari puetunu niojuanaa nia pohuataani, niaata cua quishacarija mijiria. ²⁶Cua Que jiyarosocoriquiano na Sohuanuuri nia cumaquiriquiano. Nojuajaari nia

niishitiojonutaniya puetunu cua niishitionu panishanojuanaa niajaniya. Naajuhujaj, nojuajaari nia niishitiniutianiuhua puetunu tari cua pohuatasano niajanijajanaa.

²⁷Janiyari nioojia cajitiniutianiyan. Janiyari coojia nianutaniya nioojiajiniani, juhuajaniya quijiaca nia quiniuria taa cua quiyacuaani. Naacujitij, niaari seetanujua-naa juhuajaniya quiniutianiya. Mijiria quiniaa pueyari maja na niishiniu cumanjianu juhua janiya. Naaratej, maja nia tacaaniu. Majaari puerenujuhuaj. ²⁸Tari nia sequeerecuajaniija: “Janiya quera quiohuani. Janiyari na nuhuaji tacatenutaniuhuan niaata cua quiniuria”. Naa jaara seetanujuaanaa cua panijiaca quiriqia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijiajanaa cutara janiyajiniji. ²⁹Janiya-cujaari juhuacarijia nio nia sequeyani. Naacujitij, niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuaanaa.

³⁰Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojtiaashijiaca jiyaniijia. Pueyaracaanu cua Que Pueyaso tojjia cua quiniucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjiani, na panijia cua quiniucua.

⁷Nia sanetare. Niiquiji pa quiaare.

Jesu pueyari juhua Jesu cashacucua, Jesu quishacari juhua neyona

15 ¹Jesuuri naa pohuataquiaari socua canaa niquiara:

—Janiyari juhua uva* jiyonani, cua Que natau. ²Cua pueyari juhua cua

cashacucua. Tamonu cua cashacucujajini-jinio jaara muetuyashijia quiri, cua Queeri na piyotaja. Teyano cua cashacucujajiniote muetujua saniniunijia, cua Queeri na nacareetaja, socua queraatia na muetunura. ³Nia tojiniiucua cua rootasano, niaari tari juhua nacareetasano quiya. ⁴Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhujaj, majaari nia naata muetujua quiniu, niaa jaara coojia rupueyashijiaca quiri.

⁵Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajaniya-cuaani, naacujitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju. ⁶Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucusaarohuari manijinia quejoosocoriquiano. Tii cateyari.

⁷Niaa jaara coojia rupuejaca quiri, niaa jaara cua rootasano tojjijia quiriijuuhuj, puetunu nia panishanoocuarajanaa nia secojore Pueyaso.

Nojuacuajaari nia masasano miiniutianiya. ⁸Naa cua Que miishacari nia panishanotej, niaari juhua queraatia muetujuaca quiniutianiya. Naacujitij, cua Queeri jiyanohua timitiasaanutaniya. Naacujitij, niishishaanutaniyajaariuhua niaari cua tojtiajaca pueyaniyojua.

⁹Janiyari nia panijiani, taa cua Que pania janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰Janiyari cua Que panishanoni, pueyaracaanu cua miiniucua na panishano. Naajuhujaj, niaa jaara cua rootasano tojjijia quiriqia, niaari

pueyaracaanu cua panishano pueya quiniutianiyajuhuaq.

¹¹Janiyari naa nia sequeyani, shuquiriaatia quijiaca nia quiniuria, taa shuquiriaatia quijia cua quiyacuaani. Naacujitij, niaari tojetaarucujanaa shuquiriaatia quijiaca quiniutianiya.

¹²Cua tojiri. Nioori cua sequesano niaara: “iPueyaracaanu panitioojuaca nia quiriquia, taa cua paniya niajaniyacuaani!” ¹³Cante tama na cuaqueyajaaja panitaja na cusonura na rupuenaa nitini, naa miiija cutaraari seetanujanaa jiyanoa narta pueya panijia. ¹⁴Niaa jaara cua sequesano mijiaca quiri, niaari cua rupuenaa. ¹⁵Naacujitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu miquiaacuaani. Janiyari quiarijia nia sequeya cua rupuenatani, cua niishitiniuucua niajaniya puetunu cua Que sequesanojuanaa janiya. ¹⁶Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria niajaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niquitionutaniya seetanujanaa coojia rupuejaca nioojia quishacari. ¹⁷Janiyari cunora nia sequeyani: “Pueyaracaanu panitioojuaca nia quiri”.

Pueyaso niishiyashijiaca pueyari Pueyaso muerasu niquiniu paniyashijiaca

¹⁸Pueyaso niishiyashijiaca jaara nia niquiniu paniyaquiriquia, majaari nia tacaani. Cuno pojoricujaari naa cua niquitiuniu paniyaquijiacacuaa. ¹⁹Niaa

jaara Pueyaso muerasu quiyaquiriquia, Pueyaso niishiyashijiaca maara nia panijia quiriquia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijiaca quiquiaarijuhuaq. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiacaari nia niquiniu paniyaquiquiaa, maja tari nia quishacari juhua nojori. ²⁰Majaari nio cua sequesano nia niyajetanu: “Seruuri maja socua tojishano na camarnujiniji”. Naaratej, Pueyaso niishiyashijiaca jaara naquiya cua miquiaacuaa, niaari naquiya miishaanutaniyajuhuaq. Naajuhuaq, nojori jaara cua rootasano tojiquiaacuaa, nojoriiri nia rootasano tojijia quiniutianiyajuhuaq. ²¹Nojoriiri naa naquiya miiniutianiya niajaniatej, cua pueya nia quiniuucua, nojori niishiyaquishacari cua Jiyarona.

²²Janiya jaara niaquiquiaari nojori cua pohuatanura Pueyaso rupaani, nojoricuara maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: “Cua jiyanoori. Maja cua niishiniu quiquiaari quia rootasano”.

²³Cante cua niquiniu paniyashijiani, nojoriiri cua Que niquiniu paniyashijiajuhuaq. ²⁴Sesa nojori miishano maara nojoricuara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa mijioquiaari cua cumaacata nojori niquiarani, socua tamasa miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniyaquijia, cua Que niquitiuniu paniyaquijiacajaariuhuaq. ²⁵Naajaa, naa nojori miiniuucua janiyatej, tariucuaacuanu Pueyaso Rupaajinia naajiotasano

janiyajinijiiri tari tohuateeree. Naa sequeyari:

“Janiyari najuhuana niquiniu paniya-quishiyani”.

²⁶Janiya jaara cua Que shuriucua quishuhuan, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitiaja. Nojuajaari janiyajiniji niishitiniutianiya pueya. ²⁷Niaari janiyajiniji pohuatanutaniya pueyajuhuaj, pueyaracaanu cuata nia quiniucua shushajanaa cua coteesacari pohuatanu Pueyaso rupaa.

16 ¹Janiyari naa nia numooteyani maja nia tarinitianura cucua tiuunui niaa jaara naquiya miishaare. ²Cua pueya nia quiniucua, majaari nia shanacusaanu quiniutianiya nia tiuquitianura Pueyaso secojojuat iacajinia. Pueya jaara nia puecoorejehuaj cua tojitiajaca nia quiniucua, nojoriiri jiyaniutianiya nojori maninia miya Pueyasora, naa nojori miishacari. ³Nojoriiri naa miiniutianiya niajaninyatej, nojori niishiyaquiniucua janiya, cua Quejehuaj. ⁴Janiyacujaari juhuacarijia naa nia sequeyani. Naacujitij, niaa jaara naquiya miishaare, niocua jiyacari niishiri janiyacujaari tari naa nia sequequiarini. Majaari quenaaja nio cua sequenu quijia niajaniya, pueyaracaanu niaata cua quiniucua.

Pueyaso Sohuanu miishanojiniji pohuatasano

⁵Quiarijiani, janiyari cua Jiyaronaacua quiohuani. Quiarijiani, majaari quenaaja niajanijajinijinio nequesotanu janiya: “¿Tee quia quiohuarini?” ⁶Janiya jaara nia sequereeni janiya quianutaniuhuan, niaari saaja taraajequee. ⁷Seetanujanaa nia sequeyanijia, socua maninia quiniutianiya niaaraari, janiya jaara quiaarohuan. Janiya jaara quiaaquiayaro-huan, majaari Pueyaso Sohuanu ninui

quiniutianiya niaacua, na cumaquiniuria niajaniya. Janiya jaara quiaarohua cutarani, janiyari niaacua na jiyaronutaniyani. ⁸Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujanaa sesa miijiaca. Nojori niishitiniutianiyaajaariuhua nojoriiri na naata sesa miyashijiacara jiyatesaanu. Naajuhuaj, nojori niishitiniutianiyaari Pueyasoori na naata jiyanooniu nojori, maja Sesaacata nojori cojiritiasaanura mani quiquiojinia quejoonu. ⁹Seetanujanaa, Pueyasora, nojoriiri sesa miijiaca nojori tiuyaquiniucua cucua. ¹⁰Jiyocua-caanu cua tacasacariuhua cua Queecua, majaari socua nia niquiniu quiniutianiya janiya. Naacujitij, Pueyaso Sohuanuuri pueya niishitiniutianiya, janiyari seetanujanaa cua Que Pueyaso jiyanootijia cucua tiuuriquiano pueyani. ¹¹Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutianiya. Naacujitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuaj, cucua nojori tiuyaquiniucua.

¹²Janiyari queraatia jiitiaajaa cua pohuatanura niajaniani. Naajaa, majaari cua pohuatanu quiniutianiya quiarijia niajaniya. Juhanojuaja maja nia naata na niishiniu. Pueraruhua. ¹³Pueyaso Sohuanu tiuquishacari niaacua, nojuajaari nia niishitiniutianiya puetunujanaa cutara. Nojuajaari seetanu rupaajanaa jiitiaja. Nojuajaari maja tama na niishishanojuaja na niishitiniu quiniutianiya niajaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyaajaariuhua taate nio pa quishacari nuhuaji quiniutianiyani. ¹⁴Niaari cua shuquiritianutaniya, nojuaja niishitiniucua niajaniya janiyajiniji.

¹⁵Puetunu cua Que jiitiasanojuanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiitiasano niaara, na caminiujiuniuria niajanijarajuhuj.

¹⁶Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuhuj.

Nia taraajenuuri jatanutaniya shuquiriaatia nia quiniuria

¹⁷Jiyacaritij, noojiaqueya canaa na saquirojosano pueyajinijinioori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu panijajaaraniuhua na sequesacari: “Pasa naataja na nuhuaji niaari cua niquiniutianihuacuhuj”, na sequesacarijihuhuj: “Cua Queecua quianutaniuhuanijia”? ¹⁸Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuhuj”. ¿Niaatejaara niojiniji nequesoreetoya tama niajanijajaaja? ²⁰Seetanujuanaa nia sequeyanijia, niaari nujuquenutaniya. Niaari taraajecnutaniyajuhuj. Jiyacaritij, Pueyaso niishiyashijiaaari taquiya shuquiriaatia quiniutianiyacuaa niajanijajiniji. Naajaa, cuno nia

taraajenuuri jatanutaniya shuquiriaatia nia quiniuria. ²¹Naajaariuhuj, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu nijajetaqueeri, na mueya na timitiasacari.

²²Quiarijiani, niaari naa taraatia quiyajuhuj. Naajaa, niaacua tacatenutaniuhuanijia. Niaari jiyanoehua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquiriniujaariutianu.

²³Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niquitionutaniya puetunu nia masanojuanaa nojuaja, seetanujuanaa coojia rupuejaca nioojia quishacari. ²⁴Majaari juhuanojuaja nia secojonu Pueyaso seetanujuanaa taa cua sequeya-cuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitisaare, seetanujuanaa shuquiriaatia nia quiniuria.

Jianijia Jesuuri Sesaaca shocotana

²⁵Janiyari pueyaracaanu nia pohuata-quiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojinijia niajanijia. ²⁷Cua Quejanaacuajaari nia panijia, nia paniniucua janiya, nia niishiniucujuhuj janiyari na jiyarosanoni. ²⁸Niaacuajaari niishiya, janiyari cua Que shuriucujia niquiaarini pueyano-ra cua quiniuria mijiria. Quiarijia saniniucujia, janiyari nio jiya tiujanutaniyani, cua Queecua cua quianuhua.

²⁹Naa Jesu sequesacari canatej, canaari na sequereeni:

—Quiarijia cutara, quiaari maatiajanaa sequeeree, maja miriqui. ³⁰Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuaajitij, canaari niishiyani, quiaacuaajaqui Pueyaso Jiyarosano.

³¹Jesuuri canaa sequeeree:

—¿Naatee? ¿Niaate shusha cucua tiyuruhua? ³²Tari quenaacoyari naquiya cua miishaanura. Seetanujanaa quiarijiaari. Niaari cucuaji cocuatasanutaniya puetunujuanaa. Niaari tamajaaja cua tiujanutaniya. Naajaa, seetanujanaa maja cua quiniu tamajaaja. Cua Quecuaajaari cua cojiyani. ³³Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiushacari. Mijiria nia quishacari, niaari seetanujanaa naquiya miiniutianiya. Naajaa, janiyacuaajaari mijiria jiyaniijia shocotareeni. Naacuaajitij, nioojia nia cumaquiri tamajaaja.

Jesu secojosacari na pueyacuara

17 ¹Naa Jesu sequenu nuhuajitij, jiyocuacaanu na mausacari, naa na Que sequeereri:

—Cua Quenaa, janiya nio juuca naquiya miishaanutaniyani taa quia sequequiaaricuaajani. Cua tojinuucua quiajaniya, quia Jiyarosano quia jiyatere pueya timitiasano cua quiniuria. Naacuaajitij, janiyacu saniniuuja quia jiyatere pueya timitiasano quia quiniuriani, tojetaarucuaajanaa maninia mijia quia quiniuucua. ²Quiaacuaajaari quia cumaaca cua niquitioquiaari puetunu pueyajanaa cua jiitianura. Naacuaajitij, janiyari saniniuuja nojori jiyatenutaniya pueyaracaanu quijiaa nojori quiniuriani, teyano pojori quia niquitioquiaari janiyacuaajani. ³Nojori niishishacari saaja quiajaniyari seetanujanaa Pueyasocuaaja,

naajuhuaaj, nojori niishishacari janiyari quia jiyarosanonni, naacuaajitij, nojoriiri pueyaracaanu quijiaa quiniutianiya shuquiriaatia.

⁴Janiyari tari tucuateree quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. ⁵Jiya shipiniyaquishacarijia, janiyari jiyanojua shuquiriaatia quijia quiquiaari quia shuriucuaani, jiyaniijiajanaa cua quishacari. Cua Quenaa, naa quijiaa cua jiyaterohua quiarijiani, quia shuriucua cua quiniuhuaa.

⁶Quia niquitiosano pueya janiya, quia saquiriojosano pueya quia niishiyashijiaa pueyajinijinioni, quiarijia cutara, nojoriiri niishiya cante quiajaniyani. Nojoriiri quia niishiya, nojori niquiniuucua cua mijijosano quia cumaacata, cua pohuatasano quiajaniyajiniji nojori tojinuucuaajuhuaaj. Nojoriiri quia pueya quijia. Quiaari saniniuuja nojori cua niquitioquiaari. Nojoriiri quiarijia quia rupaa tojitiajaca cutara. ⁷Nojoriiri niishiya puetunu cua jiitiasanojuanaani, cunoori quia niquitiosano janiya.

⁸Janiyari quia rupaa rootacanu nojorini, quia niishitishano janiyani. Nojoriiri seetanujanaa nocua tiuurii. Nojoriiri seetanujanaa niishiya, janiyari quia shuriucuaaji niquiaarini. Niishitiyajaariuhuaaj, janiyari seetanujanaa quia jiyarosanonni.

⁹Janiyari cunora nojoriicuara quia secojiyani, seetanujanaa quia pueya nojori quiniuucua. Majaari cua secojonu quia niishiyashijiaa pueyacuara. Saaja noo pojoriicuara quia secojiyanijia, quiaa na niquitioquiaari janiyatej. ¹⁰Naaratej, puetunu cua jiitiasano pueyajanaari quia pueyajuhuaaj. Mariyata puetunu quia jiitiasano pueyajanaari cua pueyajuhuaaj. Nojori tiuuniuucua cucua, nojoriiri jatanishano pueya quiniutianiya. Naacua-

jitij, queraatia pueyari cua timitianutaniyajuhaaj, naa nojori niquishacari cua cumaaca.

¹¹Majaari puera cua tarishiniu quiniutianiya mijiria. Cua pueya cutaraari mijiria quiniutianiyaajaara, janiya jaara quiaarohua quiocuani. Jiyanoehua maninia cua Quenaa, nojori quia cojuare quia cumaacata, teyano pojori quia niquitioquiaari janiyacuaani. Naa quia jitiare nojori, jatiqui nojori quiniuria juhua niquiriyatu jiuujiaraca, taa pa quiyacuaani. ¹²Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaaca nojori quishacari. Majaari quenaaja niquiriyatu nojorijinijinio cua juurequete-nu quiquaari. Saa noojuaari juurequecanu cutara, tariucua juurequeriquiano quijiacuajatej. Naacuajitij, tariucuaacanu quia rupaajinia naajiotasanoori tohuateecanu.

¹³Quiarijiani, janiyari quiocua quianutaniyani, tee quia quiyacuaani. Niya cua quishacaritia, janiyari nio sequeya nojori niquiarani, nojori jitianura cua shuquiri-niujihuaj, tojetaarucujanaa shuquiriaatia quijiaaca nojori quiniuriajuhuaj. ¹⁴Janiyari nojori niishitioicanu quia rupaani. Naa nojori tojishacari quia rupaatej, quia niishiyashijiaaca pueyari nojori niquiniu paniyaquiquiaa. Cua pueya nojori quishacari, nojoriiri maja saaja mijiria quijiaaca na quiniu tari, taa janiyacuaani. Naaratej, mijiria quijiaaca pueyari nojori niquiniu paniyaquiquiaa. ¹⁵Naa cua secojosacari quiaritia nojoriicuaratej, majaari cua sequenu quiajaniya nojori quia rijionura niiquiji. Saaja quia secojiya cutaranijia, nojori quia cojuanura Sesaacaacuaji. ¹⁶Nojoriiri maja mijiria quijiaaca na quiniu tari cua pueya nojori quishacari, taa nio jiyajinijinio cua quiaquiyacuaani. ¹⁷Quia rupaa quia poonijiotere nojori jiuujiajinia,

tojetaarucujanaa quia tojjiaaca nojori quiniuria. Quia rupaari seetanu rupaaajanaa cutara. ¹⁸Quiaacuajaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuaj, janiyari cua pueya jiyaramiquiyani mijiria quiniaa pueyacujahuaj. ¹⁹Quia tojjiaaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa mijia cua quiniuriani. Naacuajitij, nojori niishishacari seetanu rupaaajanaa janiyajiniji, nojoriiri tojetaarucujanaa maninia mijiaaca jatanishaanutaniya.

²⁰Majaari saaja cua secojonu nio pojoriicuaru, tariucua quia tojitiyacacuaani. Janiyari secojiyajuhaaj na nuhuaji cucua tiuuriquiano pueyacuaru, noo pojoriicuaru cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹Cucua tiuuriquiano pueyacuaru secojiyanijia puetunu cucua tiuuniaajanaa cuaara quiriia jatiqui, juhua rupetootesano, taa pa quiyacuaani, cua Quenaa. Naatej, taa cua quia quioojiajiniaacuani, quiaari saniniuujia coojiajinia quiyacujua. Nojori jiuujia cuaara juhua rupetootesano quiriia poojiatajuhuaj, mijiria quiniaa pueya niishiniuria, quiaari cua jiyaroquiaari mijiria. ²²Janiyari nojori cumaquiya quia Sohuanutani, quia niquitiosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. ²³Quiaari coojiajinia quia. Naajuhuaj, janiyari nojori jiuujiajinia quiyajacuahuaj. Naacuajitij, paari nojoritia juhua niquiriyatu quiniutianiya. Naacuajitij, mijiria quijiaacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyaajuhaaj, quiaari jiyanoehua cua pueya panijia, taa quia paniya janiyacuaani.

²⁴Cua Quenaa, cuno pueya quia niquitiosano janiyani, janiyari paniyani

nojori quiniuria cuata quia shuriucua, nojori niquniuria cua shacantuuca cumaaca. Quiaari cuno cumaaca cua niquitioquiaari pueyaracaanu quia paniniucua janiya, jiya shipiniyaquishacarijia. ²⁵Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujanaa quia jiyarosaroni. ²⁶Janiyari nojori niishitiocanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanujanaa nojori niishiniuria quiajaniya. Naacujajitj, taa quia paniya janiyacuaani, nojori cuaara cuno paniniu jiitiaara nojori jiuujiajinia-juhuj. Naa nojori niishishacari quiajaniyatej, janiyari nojori jiuujiajinia quiniutianiyajuhuj.

Na paraa quiasacari Jesu

(Mt 26.47-56; Mr 14.43-50; Lc 22.47-53)

18 ¹Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari maticosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. ²Jesuuri tii jiitiquiaari canaata na rerejonura. Naacujajitj, na paraa na quiateriquiano Judasri cuno cuhuariquia niishiquiaarijuhuaj. ³Canaa quishacari tii, Judasri jiyacari soldadohua tiuquitiasee, Pueyaso Secojojuu tia cojuanaa pueyano. Cuno pojoriiri pueyacuaara secojonaa jiyaniijianucua jiyaramiquishano pueya quiriQUIAA, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴Jesuuri tari puetunujanaa niishiriquiaacuaja taa nojuaja miishaanu-

taniyani. Naaratej, nojuajaari cuhuariquia maticajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriQUIAA tii. ⁶Jesu sequesacari, “Janiyacuaaja nojuajani”, na paraari na nijiniara pojotuquee. ⁷Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani. Niaa jaara cua pajeya, nareja nia niquiri nio, cua cojiniaani.

⁹Naacujajitj, tama Jesu sequesanojuaarjia tohuateeQUIAA, nojuaja jaara naa na Que sequesQUIAA: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”. ¹⁰Jiyacaritj, Simón Pedroori tama na mueruujuaaja shitiaree na shuucuaji shiyano. Nata, pueyacuaara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco.

¹¹Jesuuri Pedro sequeere:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiyua cua miishaanurani? ¡Taaquiririni!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹²Jiyacaritj, na paraari Jesu quiaree. Nojoriiri quiquiaari Romano soldadohua,

nojori jiyaniijiajuhuaj, Pueyaso Secojoua tiaco cojuanaa pueyanio. Nojoriiri Jesu morojoturee. ¹³Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniuucua. Cuno marijia-ra, Caifásri pueyacuara secojonaa jiyaniijiajanaa quiriquiaa. ¹⁴Cuno Caifáscuaajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhuaana puetunu pueyajanaa puecoosaanura”.

Pedro coteesacari seetanu Jesujiniji
(Mt 26.69-70; Mr 14.66-68; Lc 22.55-57)

¹⁵Simón Pedroori cuata Jesu nuhuajiri-quiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataka jiniacuma. ¹⁶Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniuucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. ¹⁷Cuno niyacoori Pedro nequesotaree:

—¿Majate quiajaniya cuno Jesu pueyajinijiojuhuaj?

Pedroori na riucaaree:

—iMaja janiya!

¹⁸Shiniquiaari jiyacari jaanujuriquiaa. Nocuaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuaaj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹Jiyacaritij, pueyacuara secojonaa jiyaniijia Anásri Jesu nequesoreenu

coteeree canaa na saquiriojosano pueyajiniji. Jesu niishitiojosanojiniji Jesu nequesoreereejaariuhuaaj. ²⁰Jesuuri na sequeree:

—Janiyacuaajaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiquiyocua Pueyaso secojonuujuaca tiacajiniaqueya niishitiojoquiaa pueyani. Naajuhuaaj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹¿Casaara quia nequesoreeya janiyani? Quia nequesoreere juhuari cuno pojori, canapuate cua pohuatasano tojiquianuni. Nojoricuajaari quia sequenutaniya casaa cua rootaquiaa nojorini.

²²Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riuucasacari jiyaniijia Anástej, Secojonuujua tiaco cojuana pueyanoori Jesu jiquioco maseteree. Naa Jesu sequereeri:

—¿Naa riuucasanote pueyacuara secojonaa jiyaniijia?

²³Jesuuri na riucaaree:

—Janiya jaara sesa riucaareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseteree cua jiquiococuaraarini?

²⁴Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifáscua.

Pedro pacutesacari seetanu Jesujiniji
(Mt 26.71-75; Mr 14.69-72; Lc 22.58-62)

²⁵Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiojuhuaj?

Pedroori saaja seetaree. Sequereeri:

—iMaja janiya!

²⁶Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriqiaa, Pedro jaatesano na numocotej. Nojuajaari Pedro sequeree:

—iJaniyacujaruhua quia niquirii cuno pueyanota quia quishacari olivo cuhuari-quiajiniani!

²⁷Pedroori na seetarohuacuhuj. Caacarajaari jiyacari niunijioquee.

Jiya jiyaniijia Pilato nequesoreesacari Jesu
(Mt 27.1-2, 11-14; Mr 15.1-5; Lc 23.1-5)

²⁸Caifás tiajiniji, Jesuuri jaatucusaa-quiaari Romano jiyaniijia tiajinia. Cuno tiaari jiyanoehua puereetuca quiriqiaa, jiyaniijiaacuaji tiasano. Cuno jiyaniijiani, nojuajaari Romano jiyaniijiajanana César jiyatesano quiquiaari jiyaniijiajanana na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuucua quiri Pueyaso niquiara, naacuajitij, nojori maara Pascuara miaquesano borrego miaqueya-quirii. ²⁹Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miirucuaani, miji nia nitianura cucuani?

³⁰Nojoriiri saaja riucaaree:

—Jaara sesa miyashijia quiriqiaa, ¿canaatucua casaara quiocua na nitiamani?

³¹Pilatoori nojori sequeree:

—iNiquiiji nia jiyataarohua! iTama nia nequesoreesuhuaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucaaree:

—iNiajaniya Romano pueyani, niaacuajaari canaa sequecanu maja canaa monura pueyano!

³²Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

³⁴Jesuuri Pilato sequeree:

—¿Cunote tama quia niishishanojuajaaja naa quia nequesotanura janiyatej? ¿Tamonu soj quia pohuatacanu janiyajiniji?

³⁵Pilatoori Jesu juaarii. Na sequereeri:

—iQuiaa jaara Judiocuaca jiyaniijiaara-no quiri, janiyara naajaa! ¿Janiyateeri quiarta Judio pueyanoni? iTama quiarta Judiocuacacujajaari cucua nitiamaa quiajaniya, nia pueyacuara secojonaa jiyaniijianucua! iCua sequere casaa quia miirucuaani!

³⁶Jesuuri na riucaaree:

—Janiyacujajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuani.

³⁷Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucaaree:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niquiaarini seetanu rupaajananaa cua niishitiniuria pueya. Cante seetanu rupaajanana panijiani, nojoriiri cua sequesano tojitiajaca.

³⁸Pilatoori najuhuana na nequesotaree:

—¿Casaateeri cuno seetanu rupaaajanaa-ni?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

Pueya sequesacari Jesu cuaara mosaaria
(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecujani-jia. Nojuajaqui maja sesa na miiniu quiquianu. ³⁹Niajanía Judiocuacani, niaari puetunu Pascua juucarajanaa cua nenecojoquiaa cua cartenura nujuatejo-juajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰Puetunu pueyajanaari naa jiyano-hua nacoorohuacuhuj:

—iMaja cuno cartenu! iBarrabás quia cartere cutara!

Cuno Barrabásri nohuasejoja quijia.

19 ¹Jiyacaritij, Pilatoori na soldado-hua majacuteree Jesu, coqueeca casaata. ²Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiníuria, shaaruque toque cushitishaarohuari, juhua jiyaniijia toque. ³Naa nojori miiniu nuhuaji Jesutej, nojoriiri nocua catecano-quiaari. Na sequetureeri:

—iJudiocuaca jiyaniijianaa! iQuia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquituri.

⁴Pilatoori socua tohuataquiaari canaa Judiocuacaacua. Nojori sequereeri:

—iNia niquiri! Janiya na tohuataya niaacuani, nia niishiniuria janiyacuaja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiriuacua.

⁵Jesu muetasacari nojoriicua, juhuacontucujiniji nacaque

cushiriquiaari, shaaruque toquenio.

Pilatoori Judiocuaca sequeree:

—Nia niquiri niarta pueyano.

⁶Canaa pueyacuara secojonaa jiyaniijia-nucua, Pueyaso Secojoua tiaco cojuanaa pueyajuhuj, nojori jaara Jesu niquiquiaari, naa nacoonu coteetureeri:

—iNiyacutesanojinia quia teetere tii na cusonura! iNiyacutesanojinia quia teetere!

Pilatoori nacoyano riucaaree saaja:

—iMaja! iJaniyacuajaari niishiyani, nio pueyano maja sesa na miiniu quiquianu! iNiaa jaara na monu paniri, nia teetere tama niajanijajaaja!

⁷Canaa Judiocuacaari Pilato riucaaree:

—iCanaari Pueyaso Rootasano naajionee jiitiaani! iCanaari cunojiniji niishiyani, nio pueyano cuaara mosaaria tama na cuaqueyajaaja na jiyatenuucua Pueyaso Niyanura!

⁸Pilato tojishacari naa canaa Judiocuaca sequesano-tej, nojuajaari socua puerequiana. ⁹Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajanianiyani?

Jesuuri maja na riuacuanu quirri.

¹⁰Pilatoori na sequeree:

—iCua riucaarejaj! ¿Quiaate niishiya-quiya, janiya jiyaniijiani? iJaniya jaara panirini, cua naata cua pueya sequenu na teetenura quiajanianiyani! iJaniya jaara paniaquiriijuhuj, cua naata quia cartenujuhuaj!

¹¹Jesuuri saaja na riucaaree:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuj. Naaratej, cante niyara cua nitiamaa quiocuani, nojuajaari socua jyanohua sesa miirri quiajanianiyani.

¹²Naa Pilato tojishacari Jesu sequesano-tej, nojuajaari socua shiriiquiquiaari. Nocujaj, Jesu cartenu saniniujiuriquiaa

juucuaari. Judiocuacaari saa nacooreejaa. Naa Pilato sequetureeri:

—iCante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! iNaaratej, quiaa jaara cuno pueyano cartere, majaari socua pa jiyaniijijanaa César rupuena quia quiniu quiniutianiya!

¹³Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajituijina. Pilato tii cajiriquiaani, na tacoji pueya nujuatusaquiní, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”.

Judiocuaca rupaajinia saniniuuja, cunoori quiquiaari “Gábata”. ¹⁴Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuari-quiaa Pascuara juucajinia. Pilatoori jiyacari tii quiniaa Judiocuaca sequeree:

—iNia niquiri nia jiyaniijia!

¹⁵Pueyari saa nacooreejaa:

—iCunoori maja canaa panishano canaa jiyaniijia na quiniuria! iNiyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? iMaja!

Pueyacuara secojonaa jiyaniijianucuaari Pilato sequeree:

—iJiyaniijia Césarcaujaari canaa jiyaniijijanaa! iMaja socua tamonu jiyaniijia canaa jiitianu!

¹⁶Pilatoori socua Judiocuaca niquitio-ree Jesu, nojori teetesocoriquiano. Naaratej, nojoriiri na jiyataquiaari na teetenuuca.

Jesu teetesacari

(Mt 27.32-44; Mr 15.21-32; Lc 23.26-43)

¹⁷Jesuuri tama na teejaranojuuaaja canujutaaree pueya puecoosaquiria.

Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniuuja, “Gólgota”. ¹⁸Jesuuri tii teetesaaquiaari, socua caapiqui pueyanio. Jesuuri cuno pojori tajinia nujuaretasaree. ¹⁹Pilatoori naa naajiotequiaarijiuhua Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. ²⁰Naajiosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacujitij, queraatia Judiocuacaari cuno naajio serojoquiaari. ²¹Naaratej, Judiocuacacura secojonaa jiyaniijianucuaari Pilato juaatiurii:

—¿Casaara naa quia naajiotereeni:

“Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

²²Pilatoori nojori riuuaree saaja:

—Janiyacujaari naa naajiotereeni. iCuaara naa quiriitej!

²³Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacujitij, tariucuacaanu Pueyaso Rupaajinia naajiotasanoori tohuatee-quiaari. Naa naajiotasano quiyari:

“Cua toqueeri seraatiasaree. Cua tucuaque toqueecura tacuarishiyonuureeri, na pasocoriquiano”.

Seetanujanaa, naa miitiquiaariiri cuno soldadohua.

²⁵Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhua, Cleofas

niquiocua Mariājuhuaj, María Magdale-nanio. ²⁶Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuaara quiria juhua quia muela cua niti.

²⁷Na nuhuaji, cua sequereajaariuhuj:

—Juannaa, cua nucua cuaara quiria juhua quia nucua.

Naaratej, janiyari María riquiaari cua tijiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateeree. Naajuhuj, tariucuaa-anu Pueyaso Rupaajinia naajiotasano tohuateenurajuhuj, Jesuuri sequequiaa-ri:

—iJiyamueyanijia!

²⁹Cuniqui, vino jereecaari patacojinia mishaja cajitiariquiaa. Jiyacaritij, namasu casaari jereeca vinojinia shishaaree. Naajuaacua na morotatureeri. Na nuhuaji, Jesu rupaama shitiasaareeri.

³⁰Jesu ratunu nuhuaji cuno jereeca vino, naa sequerohuari:

—iTari tucuateree puetunujuanaacuaaja-nijia!

Naa na sequenu nuhuajitij, naniquiri. Cusoqueeri.

Soldado jitiasacari Jesu shuucuaji na cashanata

³¹Cuno juucaari canaa Judiocuaca jeenucuasacari quiriquiaa Pascuaacuaa juucajinia. Cuno marijiara, Pascua juucaari Sábado juucajinia quiriquiaaju-huj, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesano-

jinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusununu-ra, na roshinijiosaanura cuno juucaja.

³²Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacu-cua shuniitiatureejaariuhuj.

³³Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaquirii.

³⁴Naajaa, tamonu soldadoori Jesu shuucuaji jitiaree na cashanata najuhua-naj. Ritia shooqueeri nanaca, mohuacanio. ³⁵Cuno pueyano, na naajiojinia naa nia pohuataani, cunocua-jaari janiya. Janiyajanaari na niquiquiaarini. Naarate janiyari seetanu-juanaa nia pohuataani. Tama janiyajaarija niishiyani cua sequesanoori seetanujuanaa, noca nia tiuniuria.

³⁶Jesuuri naa miishaaquiaritij, tariucua-caanu nojuajiniji naajiotasano tohuateenura. Naa sequeyacuajaari juhuacaribia nojuajiniji naajiotasano:

“Majaari quenaaja na nucu shuniitia-saanu quiniutianiya”.

³⁷Tamaquiri nojuajiniji naa naajiotasano quiyajuhuj:

“Cashanata na shuucuaji na jitiatusa-no niquitiuniutianiyari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸Na nuhuaji, Arimatea tiacajinijinio Joseeri Pilato sequesee:

—Cua niquitiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. ³⁹Nicodemo-

juhuaj, noo pueyano Jesuucua niquiaari niucua nata pocojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriquiano. Na niiquiaari quiquiaari cuarenta y cinco kilo. Cuno shanohua jaanutajaari quiquiaari mirra*, aloeta cojitijosano. ⁴⁰Joseeri Nicodemota Jesu jiuniocoree toqueneecajinia. Nojori jiuniosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitiujiaca quiquiaari, na macu na niatunura raaco. ⁴¹Tee Jesu teetesaa-quiaaricuajani, cuniquijia na shuriucua quiquiaariiri cuhuariquia. Cuno cuhuari-quiajiniani, quiarinio jiutiasano raari quiriquiaa, macunucua niojojuara. Cuno raaconi, juhuanajuaja maja macu niasaanu quiquiaari. ⁴²Macuuri cuno raaco niasaaquiaari, cateca na quiniucua. Naajuhuj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

Jesu samiitasacariuhua

(Mt 28.1-10; Mr 16.1-8; Lc 24.1-12)

20 ¹Domingo*, coteenujuanaa semaaana* juucani, María Magdalenaari tariquicuaj quiaquiaari Jesu raajiniara. Ninishiquiri quiriquiaajaa. Na tiuquishacari, cuno puereetuca saajia niquishiiri тариucua tamocora ruutinishano, teyanota raa tiosaaquiaaricuajani. ²Naa na niquishacari, nojuajaari neterohua Simón Pedroocua, cucuanio. Canaa sequesuhuari:

—iPueyanaa, pa Jiyaniijiaqui na raajiniji pasaaree! iMajaari canaa niishiniu teeriquitijia na niasaaretejaj!

³Naaratej, janiyari Pedrota netequiaari raajiniarajuhuj. ⁴Canaari mariyata netecuaturiquiaa coteenuni. Janiya cutaraari socua ritia netequiaari Pedrojini. Naacuajitij, janiyari coteenu

tiuquishii raajiniani. ⁵Janiyari raaco cuuqueseeni. Janiyari saaja Jesu jiuniocotaja toque niquiri maanoni tee Jesu quete niasaarucuaacuajani. Majaari cua tiuquiniu quimiaa raaco. ⁶Simón Pedroori cua nuhuaji tiuquishii. Cami tiuquimiaa-janaa cutaraari. Nojuajaari Jesu jiuniocotaja toque niquishii tii maanojuhuaj. ⁷Jesu naca jiuniocotaja niquiriijaariuhuj tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. ⁸Pedro tiuquiniu nuhuaji raaco, janiyari shusha jiyacari tiuquimiaajaniuhuj. Cua niquishacari Jesu jiuniocotaja toque, janiyari niishiquini Jesuqui tari samiitiarohua. ⁹Canaari juhuanajuaja maja canaa niishiniu quiriquiaa тариucua-caanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. ¹⁰Na nuhuaji, canaari tiajinia quiaarohuani.

Jesu muetasacari María Magdalenaacua (Mr 16.9-11)

¹¹Canaa quiojosacariuhua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta, raaco cuuquereeri. ¹²Raaco na niquishacari, caapiqui Pueyaso seya niquiriiri, cohuajaque toquyaraca. Nojoriiri macu niasaqui cajitiuriquiaa, tamonu na nacaacora, tamonu na cashacuucumara. ¹³Pueyaso seyari María Magdalena sequeeree:

—Maajiniaa, ¿casaara quia nujuqueyani?

Nojuajaari Pueyaso seya riucuaaree:

—Cua jiyaniijia quete niiquiji pasaarucua. Majaari cua niishiniu teeriquitijia na niasaarucuaatejaj.

¹⁴Naa na sequenu nuhuajitij, na nijiniara tacaterohuari. Saaja Jesu niquiri na shuriucua nujaaanoori. Maja cutaraari na niishiniu quiriquiaa nojuaja Jesu.

¹⁵Jesuuri na nequesotaree:

—Maajiniaa, ¿casaara quia nujuqueya-ni? ¿Cana quia pajeyani?

Maríari na jiyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶Jesuuri na sequeree:

—iMaríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaaajinia na sequereeri:

—iRabuni!

Cunoori sequeya, “Cua Niishitiojona-naa”. ¹⁷Jesuuri María sequeree:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasoo-cua tacanutaniuhuan. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. ¹⁸Jiyacaritij, María Magdalenaari nimiohua canaacua, Jesu saquiriojosano pueyacuan. Nojuajaari canaa pohuatasuhua taa Jesu na niquiriini. Naajuahuaj, Jesu sequesano caminiujiurii canaaraari.

**Jesu muetasacari na
saquiriojosano pueyacua**

(Mt 28.16-20; Mr 16.14-18; Lc 24.36-49)

¹⁹Cuno domingo juucajani, shusha ninishacari, canaa, Jesu saquiriojosano pueyani, canaari jatiqi quiriquiaa tiaconi. Canaari tia tohuateya mishiquiojoquiari cumaatiiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimíaa. Canashyaqui-

ji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

²⁰Naa canaa na sequenu nuhuajitij, canaa niquitijioree na juaashiquiaari, na shuucuaaji cashana jiyanio. Canaari jiyanoehua timiriini canaa niquishacari canaa Jiyaniijia. ²¹Jesuuri socua pacuteroehua sequenu:

—iJuhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuhuaj.

²²Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. ²³Niaa jaara pueyano jiyanoori sesa na miishanojiniji, seetanujuanaa jiyanooshano quiniutianiyari. Saniniuujia, niaa jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyajaariuhuaj.

**Tomás niquishacari Jesu,
saminio seetanujuanaa**

²⁴Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵Naaratej, canaari Tomás sequequiaari na nuhuajini: —iCaapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucuaajijihuaj, janiyari nia cuaracashitiniutianiyani.

²⁶Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuan. Tomásri jiyacari canaata quiriquiaa cutara. Tia tiotiuuri maninia mishiquio-

josano quiriquiaa. Naajaa, Jesuuri saaja canaacua tiuquiriquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhuajanya nia quiri.

²⁷Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaji quia puerarejuhuaj. ¿Casaara cucuaji quia taacanuyajaani? Cucua quia tiuri.

²⁸Tomásri jiyacari Jesu sequereeri:

—iCua Jiyaniijianaa! iCua Pueyasonaa!

²⁹Jesuuri na sequereeri:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapueete cucua tiuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰Jesuuri jiyanoehua socua queraatia casaa miiquiaari na cumaacata canaa na saquiriojosano pueya niquiara. Cunoori nio nequesoreetuneejinia naajiotasoo.

³¹Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosanoo, Pueyaso Nyanutuhuaj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

Tiberias caminiajinia Jesu muetasacari na saquiriojosano pueyacua

21 ¹Na nuhuaji, Jesuuri canaa na saquiriojosano pueyacua muetaquiaarihua Tiberias caminiajinia. Naa quiquiaariti na muetasacari canaacua.

²Nio pojoriiri jiyacari mariyata quiriquiaa: Simón Pedro, Tomás (Caapueyano jiyaniushano), Natanaeljuhuaj.

Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaaanihuaj. Canaari Zebedeo niquiohuani. Socua caapiqui Jesu saquiriojosano pueyajinijnioori tii quiriquiaajuhuaj. ³Simón Pedroori jiyacari canaa sequereeri:

—Sapitiaajara quejootaseera shiyaru.

Canaari na riucuaareni:

—Canaa quiata quiaajuhuaj.

Naacuaajitij, canaari quiojiyareeni.

Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuan.

Canaari shaa juhuaquetumaani. ⁴Jiyacari-tij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani.

⁵Jesuuri canaa jiiquiooree. Canaa nequesotareeri:

—iSanajoorinia! ¿Niaate na quiaree?

Canaari na riucuaareni:

—iMaja! iShaaqui sacaj!

⁶Jesuuri canaa sequereeri:

—iNia shiyaru nia jartare nia miaquetajara bote tamajiria! iNiaari cuniqui na quianutianiya cutara!

Canaari naa miiriini taa na sequereeri canaacuaajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari.

⁷Jiyacaritij, janiyari Pedro sequereeni:

—iPa Jiyaniijiaqui!

Naa Pedro tojishacari cua sequesanteje, nojuajaari ritia na toque cushirii.

Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura.

Jiritiuri quiriquiaa. ⁸Canaari na nuhuaji jaatiariquiaa shiyaru botejinijini.

Jaaquiaari namitia maja tucuacaanu na quiniu quiriquiaa, saaja cien metroruhua.

⁹Canaa rosetasacari botejiniji, canaari na mani niquishiini. Sapitiaajaari tii majeeriquiaa, pannio. ¹⁰Jesuuri canaa sequereeri:

—Nia sapitiaajajiniji miji nia riri rarishocoriquiano.

¹¹Simón Pedroori ritia botejinia tacamaa. Shiyaru tacanitiaree jaaquijajiniaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹²Jesuuri canaa sequereee:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, cantejaaranojoni. Canaacuajaari niishiriquiaani nojuacuajaari canaa Jiyaniijia Jesu. ¹³Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaa-riuhujaj.

¹⁴Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocoojosacari Simón Pedrota

¹⁵Canaa miaquenuunu nuhuaji, Jesuuri Simón Pedrota pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequereee:

—Cua borregohua niquiohuaniyojua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. ¹⁶Jesuuri Pedro nequesotarohuacuhujaj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequereee:

—Cua borregohua cojuanara quia quiriqui.

¹⁷Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja.

Seetanujanaa Jesu riucuaareeri:

—iJiyaniijianaa, quiaacuajaari puetunujanaa niishiya! ¡Quiaari niishiya janiyari quia paniyani!

Jesuuri na sequereee:

—Cua borregohuaniyojua cojuanara quia quiriqui. ¹⁸Seetanujanaa quia sequeyanijia, mashaja quia quishacari, tama quiajaniya-jaarijia quia toque cushijia, quia quianura quia panishaqui. Saniniuuja, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequereee:

—iPueyaracaanu cua tojjia quia quiri! Pa quiaarej.

Juanjiniji pohuatasano

²⁰Pedro tacatesacari na nijiniara, Jesu panishano pueyano niquiri na nuhuaji sacuaanoori. Nojuacuajaari janiya. Janiyari noo pueyanocujani, canaa miaquenuusacari Pascuara, Jesu shuriucua cua cajishacari na nequesotaquiaarritij: “¿Cantejaara cunoni, quia quiatenutaniyani?” ²¹Quiarijiani, Pedro niquishacari janiya saniniuuja, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijataj, taa na miishaanutaniyarini?

²²Jesuuri Pedro riucuaare:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuaajatijia, quiara, naajaa. Quiajaniya cutara, pueyaracaanu cua tojijia quia quiri.

²³Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara

jiyocuacaanuji tacatemohuaajatijia, quiajaniyara naajaa”.

²⁴Janiyacuaajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵Jesuuri jiyanoehua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetuneecaacujijianaa.